

**1:1** Bani mungkahni domma adong Hata in, anjaha rap pakon Naibata do Hata in, anjaha Naibata do Hata in. **2** Rap do In pakon Naibata bani mungkahni. **3** Haganup marhiteihonsi do ase adong, anjaha seng dong na dob dong in, na so marhiteihonsi. **4** Ibagas Hata in do hagoluhan, anjaha hagoluhan in do panondang ni hajolmaon, **5** Na marsinondang do panondang in ibagas na golap, tapi seng ijalo na golap in. **6** Bangkit ma sada halak, na sinuruh ni Naibata, na margoran si Johannes. **7** Laho manaksihon do ia ase roh, ase isaksihon panondang in, ase haganup porsaya marhiteihonsi. **8** Seng ia panondang in, tapi sisaksihon panondang in do ia. **9** Panondang na sintong in, na manondangi ganup jolma do, na roh hu dunia on. **10** I dunia on hinan do Ia, anjaha marhiteihonsi do adong dunia on, hape seng itanda dunia on Ia. **11** Na roh do Ia marayak na dong Bani, tapi seng ijalo na dong Bani in Ia. **12** Tapi barang piga na manjalosi, hujai do ibere kuasa, ase gabe anak ni Naibata sidea, ai ma na porsaya bani goranni. **13** Ai ma na so tubuh humbani daroh barang humbani rosuh ni daging barang humbani rosuh ni dalahi, tapi humbani Naibata do. **14** Gabe daging ma Hata in, anjaha marianan itongah-tongahta; jadi iidah hanami ma hasangaponni songon hasangapon ni anak sasada na humbani Bapa in, gok idop ni uhur ampa hasintongan. **15** Isaksihon si Johannes do Ia, nini do marsora na gogoh: On do Ia na huhatahon ai, na roh hun pudingku; lobeinan do Ia adong ase ahu, ai parlobei hinan do Ia. **16** Humbani habayakonni do haganup hita manjalo, ai ma idop ni uhur na marnunut. **17** Marhitei si Musa do ibere titah, tapi marhitei Jesus Kristus do manjadi idop ni uhur ampa hasintongan. **18** Ise pe lang na onga mangidah Naibata; Anak na sasada in, na bani abingan ni Bapa in, Ia do na pabotohkonsi. **19** On do hasaksian ni si Johannes, sanggah roh hubani malim ampa halak Lepi hun Jerusalem, na sinuruh ni halak Jahudi na ijai ai, laho manungkunsi, atap ise do ia. **20** jadi iakuhon do, seng iporsou, nini ma: Sedo Ahu Kristus in. **21** Isungkun sidea ma ia: Ise do, anggo sonai? Ai si Elias do ham? Jadi nini ma: Seng ahu ai! Ham do nabi na pinarbagah ai? Balosni: Lang! **22** Dob ai nini sidea ma hubani: Ise do anggo sonai, ase tarbalosi hanami na marsuruh hanami. Aha do hatahononmu pasal ham?

**23** Jadi nini ma: Ahu, ai ma sora na dilo-dilo i halimisan: "Papintor ma dalam ni Tuhan in!" songon na hinatahon ni nabi Jesayas. **24** Ia na sinuruh ai humbani halak Parisei do. **25** Jadi nini sidea ma manungkunsi: Mase ma mandidi ham, anggo seng Kristus ham, atap si Elias atap Nabi ai? **26** Jadi nini si Johannes ma mambalosi sidea: Ia ahu bah do hudidihon, tapi domma jongjong itongah-tongahnasiam Ia, na so tinanda nasiam in, **27** na roh hun pudingku, anjaha na hurang talup do ahu, mananggali tali ni sipatuni. **28** I Betania do ai masa, idipar ni bah Jordan, ijai do ianan ni si Johannes mandidi. **29** Patarni ai iidah si Johannes ma Jesus roh hubani, gabe nini ma: Tonggor ma, Ia do biri-biri ni Naibata, na mamorsan dousa ni dunia on! **30** Ia do ai na huhatahon ai: I pudingku roh do sada halak, na dob parlobei do Ia adong ase ahu, ai parlobei do Ia adong ase ahu. **31** Ahu pe seng hutanda hinan Ia, tapi ase talar Ia bani bangsa Israel, ai do ase roh ahu mandidihon bah. **32** Dob ai isaksihon si Johannes ma, nini ma: Huidah do Tonduy in susur songon asas hun nagori atas anjaha marianan Bani. **33** Ahu pe seng hutanda hinan Ia. Tapi Ia na marsuruh ahu mandidihon bah, Ia do mangkatahon hubangku: Ia hubani ise iidah ho susur Tonduy in anjaha marianan Bani, Ia ma sididihon Tonduy Na pansing. **34** Ase domma huidah anjaha husaksihon: Ia do Anak ni Naibata. **35** Patarni ai jongjong ma use si Johannes ijai rap pakon dua susianni. **36** Jadi sanggah niidahnai ai Jesus montas, nini ma: Tonggor ma, Ia do biri-biri ni Naibata! **37** Dob ibogei susianni na dua ai hatani ai, jadi iirikkon sidea ma Jesus. **38** Marhusor ma Jesus, gabe iidah ma sidea mangirikkonsi, jadi nini ma hubani sidea: Aha do na panindahannima? Jadi nini sidea ma hubani: Rabbi (artini: guru), ija do Ham marianan? **39** Nini ma hubani sidea: Roh ma hanima, ase iidah hanima! Jadi roh ma sidea, iidah ma iananni ai, jadi rap ma sidea pakonsi sadarini ai. Tar pukul ompat ma ai. **40** Si Andreas, sanina ni si Simon Petrus do sada humbani na dua ai, na mambogei hata ni si Johannes ai, anjaha na mangirikhon Jesus ai. **41** Dob ai jumpahsi ma lobei si Simon, saninani ai, jadi nini ma dompaksi: Domma jumpah hanami Mesias in (artini: Kristus) **42** Ibobai ma ia bani Jesus, ikawahkon Jesus ma ia, lanjar nini ma hubani: Si Simon do ho, anak ni si Jonas; si Kepas ma ho goranon (artini: Petrus; batu gingging)! **43** Patar ni ai, sanggah na sihol

laho Ia hu Galilea, jumpahsi ma si Pilippus. Jadi nini Jesus ma hubani: Irikkon ma Ahu! **44** Ai si Pilippus ai hun Betsaida do, ai ma huta ni si Andreas ampa si Petrus. **45** Jumpah si Pilippus ma si Natanael, jadi ihatahon ma hubani: Domma jumpah hanami Ia, na sinahapkon ni si Musa ibagas titah in, sonai homa nabi-nabi ai ma Jesus, anak ni si Josep, na hun huta Nasaret. **46** Dob ai nini si Natanael ma hubani: Mintor tarbahen ma roh na madear hun Nasaret? Jadi ihatahon si Pilippus ma: Roh ma ho, ase iidah ho! **47** Iidah Jesus ma si Natanael roh hubani, jadi nini ma pasalsi: On ma sada halak Israel na sintong, na so maruhur lekluk ibagas. **48** Nini si Natanael ma hubani: Hunja itanda Ham ahu? Jadi nini Jesus ma mambalosisi: Sanggah lape idilo si Pilippus ho, domma huidah ho itoruh ni hayu ara ai. **49** Nini si Natanael ma hubani: Rabbi, Ham do Anak ni Naibata, Ham do Raja ni Israel. **50** Jadi nini Jesus ma mambalosisi: Halani na huhatahon ai do bam: Huidah do ho itoruh ni hayu ara ai, ase porsaya ho. Sibanggalhonon ni ai ope idahonmu! **51** Lanjar nini ma hubani: Na sintong tumang do na huhatahon bannima: Idahonnima do mungkab nagori atas anjaha naik-turun malekat ni Naibata marayak Anak ni jolma in.

**2:1** Anjaha bani ari patoluhon adong ma na marunjuk i huta Kana, na i nagori Galilea, anjaha ijai do inang ni Jesus. **2** Jesus pe ampa susianni ai iontang do bani pesta ai. **3** Jadi dob hurangan anggur sidea, ihatahon inang ni Jesus ma hubani: Seng dong be anggur ni sidea! **4** Jadi nini Jesus ma hubani: Aha urusanmu bangku, inang? Seng roh ope panorangku. **5** Nini inangni ai ma hubani siparugas ai: Barang aha ihatahon bani nasiam, bahen nasiam ma! **6** Mangihutkon adat parburihon ni halak Jahudi, adong do ijai onom gusi siat dua ronsi tolu bat (sada bat ai ma \* **40** liter). **7** Ihatahon Jesus ma hubani sidea: Goki nasiam ma gusi in bani bah! Jadi gok tumang ma ibahen sidea. **8** Dob ai nini ma hubani sidea: Tahui nasiam ma hunjin, anjaha boan nasiam ma hubani kopala ni pesta on! Jadi iboan sidea ma. **9** Dob idai kopala ni pesta ai bah na dob salih gabe anggur ai, seng ibotuh hunja harohanni ai, pitah siparugas na manahui ai do hansa mambotuh ai, idilo ma siparunjuk ai, **10** anjaha nini ma hubani: Haganup halak mambere parlobei anggur sidearan, dob bosur pe, ase ibere tar na hurang daini. Tapi

anggo ham, isimpan ham do anggur sidearan ronsi sonari. **11** Ase ai ma tanda na parlobei, na binahen ni Jesus i huta Kana, na i Galilea, laho patalar hasangaponni, gabe porsaya ma susianni Bani. **12** Dob salpu ai, tuad ma Ia hu Kapernaum rap pakon inangni, ampa saninani ampa susianni, anjaha ijai ma sidea tar hundokah. **13** Halani domma dohor pesta Paska ni Jahudi, jadi tangkog ma Jesus hu huta Jerusalem. **14** Jadi jumpahsi ma hundul i rumah panumbahan ai partiga-tiga lombu, biri-biri pakon asas ampa situkari duit. **15** Jadi ipauli Jesus ma tali bahen lonsing-lonsing, anjaha iusir ma sidea haganup hun rumah panumbahan ai rap pakon biri-biri ampa lombu; isampakkon ma duit ni sipanukari ai, anjaha ipantunggalingkon ma meja ni sidea. **16** Dob ai nini ma hubani partiga-tiga asas ai: Boan nasiam ma in hunjon! Ulang bahen nasiam rumah ni Bapa gabe rumah partiga-tigaan! **17** Jadi idingat susianni ma hata na tarsurat in: Ringis mangkopkop rumahmu do mangankon ahu. **18** Dob ai nini Jahudi ma mambalosisi: Aha ma tanda patuduhonmu bannami, paboa na boi sonin bahenonmu? **19** Jadi nini Jesus ma mambalosi sidea: Parseda nasiam ma rumah panumbahan on, dob ai pajongjongonku ma in ibagas tolu ari. **20** Dob ai nini Jahudi ma: Ompat puluh onom tahun do dokahni ipauli rumah panumbahan on, ia Ham, ibagas tolu ari nimu pajongjongonmu in? **21** Tapi angkulani ai do rumah panumbahan, na hinatahoni ai ijai. **22** Ase, dob puho Ia humbani na matei idingat susianni ai ma hata ondi, gabe porsaya ma sidea bani hata ni surat in ampa bani hata na hinatahon ni Jesus. **23** Anjaha sanggah i huta Jerusalem Ia, bani pesta Paska ai, buei do na gabe porsaya bani goranni, dob iidah sidea tanda na binahenni ai. **24** Tapi seng ihaporsayai Jesus sidea, halani itanda do sidea haganup. **25** Anjaha seng porlu Bani hasaksian ni atap ise pe pasal jolma in, ai ibotoh do na ibagas uhur ni jolma in.

**3:1** Ase adong ma sada halak humbani Parisei, na margoran si Nikodemus, pangintuai ni halak Jahudi. **2** Na roh do ia borngin-borngin marayaksi, anjaha nini ma hubani: Rabbi, ibotoh hanami do Ham guru na roh humbani Naibata, ai seng tarhorjahon atap ise tanda songon na binahenmu in, anggo seng Naibata hasomanni. **3** Dob ai nini Jesus ma

mambalosisi: Na sintong tumang do na huhatahon bamu: Anggo seng tubuh halak paduahalihon, seng tarbahensi mangidahharajaon ni Naibata!

**4** Ihatahon si Nikodemus ma hubani: Sonaha ma tarbahen use tubuh halak, anggo domma matua? Mintor tarulakisi ma masuk hu partapaan, ase itubuhkan inangni use!

**5** Nini Jesus ma mambalosisi: Na sintong tumang do na huhatahon on bamu: Anggo seng tubuh halak humbani bah pakon Tonduy, seng tarmasukisi harajaon ni Naibata.

**6** Aha tubuh humbani daging, ai ma daging, anjaha aha tubuh humbani Tonduy, ai ma tonduy.

**7** Ulang ma longang u hurmu, halani huhatahon bamu: Maningon tubuh nasiam padua-halihon.

**8** Na mangombus do logou dampak rosuh ni u hurni, ibogei ham do pardongosni, tapi seng ibotoh ham hunja rohni atap huja lahoni. Sonai do ganup na dob tubuh humbani Tonduy.

**9** Dob ai nini si Nikodemus ma mambalosisi: Sonaha ma parjadini ai?

**10** Jadi nini Jesus ma mambalosisi: Ham guru ni halak Israel, lang ibotoh ham in?

**11** Na tongon tumang do na huhatahon on bamu: Na bibotoh nami do ihatahon hanami, anjaha na niidahnami do isaksihon hanami, tapi seng ijalo nasiam hasaksiannami.

**12** Gari na i dunia on huhatahon bani nasiam, seng porsaya nasiam, mintor porsaya ma nasiam, anggo huhatahon bani nasiam na i nagori atas?

**13** Anjaha seng dong na naik hu nagori atas, sobali na susur hun nagori atas in, in ma Anak ni jolma in.

**14** Anjaha songon na dob pinagijang ni si Musa ulog i halimisan, sonai do pagijangon Anak ni jolma in,

**15** ase dapotan hagoluhan na sadokah ni dokahni sagala na porsaya Bani.

**16** Ai sonon do holong ni uhur ni Naibata bani dunia on, pala do Anakni na sasada in iberehon, ase ulang magou ganup na porsaya Bani, tapi ase hagoluhan na sadokah ni dokahni bani.

**17** Ai seng isuruh Naibata Anakni in hu dunia on, laho manguhumi dunia on, tapi ase maluah do dunia on marhiteihonsi.

**18** Seng siuhumon na porsaya Bani, tapi na so porsaya domma hona uhum, halani lang porsaya ia bani Goran ni Anak sasada ni Naibata.

**19** Tapi on ma uhum ai: Domma roh na lihar in hu dunia on, tapi holongan do uhur ni jolma bani na golap in ase bani na lihar in, ai na jahat do horja ni sidea.

**20** Ai ganup na mangkorjahon na masambor, sogam do u hurni bani na lihar in, anjaha seng ijumpahkon na lihar in, ase ulang talar horjani ai.

**21** Tapi na mangkorjahon hasintongan in, ijumpahkon do na

lihar in, ase talar horjani ai, ai ibagas Naibata do ihorjahon ai. **22** Dob ai laho ma Jesus rap pakon susianni hu tanoh Judea, anjaha soh ijai lobei rap pakon sidea lanjar mandidi. **23** Anjaha si Johannes pe mandidi do i Aenon, dohorhon huta Salim, ai buei do bah ijai. Marrohan do halak hujai, laho padidihon dirini. **24** Ai seng tartutup ope si Johannes ijia. **25** Jadi tarjadi ma parsualon bani susian ni si Johannes ampa sada halak Jahudi pasal parburihan. **26** Roh ma sidea bani si Johannes, anjaha nini sidea ma dompaksi: Rabbi, halak ondi, na roh hubamu i dipar ni bah Jordan, ai ma na sinaksihonmu ondi, tonggor ham ma, mandidihon do Ia nuan, anjaha marrohan do ganup halak Bani. **27** Dob ai nini si Johannes ma mambalosi: Seng tarbuat jolma atap aha pe, anggo seng na binere ai bani hun nagori atas. **28** Hanima sandiri do saksingku, sanggah huhatahon: Sedo ahu Kristus in, tapi na sinuruh do ahu parlobeini. **29** Simada tunangan, ai do siparunjuk. Ia huan-huan ni siparunjuk, na jongjong patangi-tangisi, marmalas ni uhur do halani sora ni siparunjuk ai. Malas ni uhur na sonai do na adong bangku. **30** Anggo Ia, patut do lambin banggal, tapi ahu lambin etek ma. **31** Na roh hun datas, Ia do na mangatasi haganup. Na hun tanoh on, partanoh on do ai, anjaha pasal na i tanoh on do isahapkon; na roh hundatas, Ia do na mangatasi haganup. **32** Na niidahni ampa na binogeini do isaksihon, tapi seng dong na manjalo hasaksianni ai. **33** Halak na manjalo hasaksianni ai, iakui do, paboa parsintong do Naibata. **34** Ai na sinuruh ni Naibata, Ia do na mansahapkon hata ni Naibata, anjaha seng marsibar Ia mambere Tonduy in. **35** Holong do uhur ni Bapa in bani Anak in, anjaha haganup do iondoskon hubagas tanganni. **36** Na porsaya bani Anak in, dapotan hagoluhan na sadokah ni dokahni, tapi na so mambalosi Anak in, seng idahonni ai hagoluhan, tapi ringis ni Naibata do totap bani.

**4:1** Jadi dob ibotoh Tuhan in, na dob ibogei Parisei, bueinan do susian ampa na nididini marimbang si Johannes. **2** age pe seng Jesus sandiri mandidihon, tapi susianni do, **3** itadingkon ma Judea, anjaha mulak ma Ia hu Galilea. **4** Tapi maningon bontasonni do nagori Samaria. **5** Jadi das ma Ia hu sada huta na i Samaria, na margoran Sikar, dohorhon juma, na binere ni si Jakob bani si Josep, anakni ai. **6** Ijai do parigi ni si Jakob. Jadi halani

na dob loja Jesus na mardalan ai, hundul ma Ia ilambung ni parigi ai, anjaha tar tongah arian ma ai. **7** Dob ai roh ma sada boru Samaria, laho manahui bah. Jadi nini Jesus ma hubani: Bere ham ma bangku bahmu in otik! **8** Ia susianni ai, domma laho hu huta mamboli bohal. **9** Jadi nini boru Samaria ai ma hu-Bani: Mase Ham, halak Jahudi, mangindo bah inumon humbangku, boru Samaria? Ia halak Jahudi seng marparsaoran ai pakon halak Samaria. **10** Dob ai nini Jesus ma mambalosisi: Ambit itanda ham sibere-bere ni Naibata ampa na mangindo bah inumon humbamu, gabe ham ma mangindo hum-Bani, jadi bereonni ma bamu bah na maggoluh. **11** Jadi nini naboru ai ma hubani: Tuan, gari tahu-tahu seng dong Bamu, anjaha bagas do parigi on; mintor hunja ma adong Bamu bah na manggoluh? **12** Mintor banggalan ma Ham ase ompungta si Jakob, na mamberehon parigi on bannami? Ia do na minum hunjin, anakni ampa pinahanni. **13** Dob ai nini Jesus ma mambalosisi: Sagala na minum humbani bah on mangulaki horahan do, **14** tapi na manginum bah sibereonkai, seng horahan be ia sadokah ni dokahni. Ia bah sibereonkai gabe bah tubuh do ai ibagas dirini, na marjullak-jullak ronsi hagoluhan sisadokah ni dokahni. **15** Dob ai nini naboru ai ma hubani: Tuan, bere Ham ma bangku bah na sonai ai, ase ulang horahan be ahu, anjaha ulang pala be sai roh hujon laho manahui. **16** Ihatahon Jesus ma hubani: Laho ma ham, dilo ham ma pargotongmu, dob ai roh ma ham hujon! **17** Dob ai nini naboru ai ma mambalosi: Seng dong pargotongku. Nini Jesus ma hubani: Tongon do hatamu, seng dong pargotongmu. **18** Ia ham domma lima hali laho, anjaha dalahi na rap pakon ham sisonari ai, sedo pargotongmu ai; ase na sintong do na hinatahonmu ai. **19** Jadi nini naboru ai ma hu-Bani: Tuan, huahap nabi do Ham! **20** Ia ompungnami i dolog an do martonggo, hape nasiam mangkatahon, Jerusalem do ianan martonggo. **21** Nini Jesus ma hubani: Porsaya ma ham Bangku inang, na roh ma panorangni, seng be i dolog an atap i Jerusalem nasiam marsombah bani Bapa in. **22** Isombah nasiam do na so tinanda nasiam, tapi anggo hanami na tinandanami do isombah hanami, ai halak Jahudi do harohan ni haluahon. **23** Na roh ma panorangni, anjaha domma roh ai nuan, gabe ibagas Tonduy ampa hasintongan ma sagala partonggo na sintong martonggo hubani Bapa in, ai

partonggo na sonai do ipangindo Bapa in. **24** Tonduy do Naibata, ase sagala na martonggo hu-Bani, maningon do martonggo ibagas Tonduy ampa hasintongan. **25** Nini naboru ai ma hu-Bani: Hubotoh, ia Mesias in (ai ma Kristus), maningon do roh. Roh honsi Ia, baritahononni ma ganupan ai bannami. **26** Ihatahon Jesus ma hubani: Ahu do in, na marsahap pakon ham! **27** Dob sonai, roh ma susianni, anjaha longang do uhur ni sidea, halani na marsahapi ai Ia pakon naboru ai. Tapi sahalak pe seng dong na manungkun: Aha sungkunonmu? atap: Aha sahapkononmu bani? **28** Itadingkon naboru ai ma pangalopan ni bahni, mulak ma ia hu huta lanjar nini ma hubani halak na ijai ai: **29** Eta nasiam! Tonggor nasiam ma sada halak, na patugahkon bangku haganup na dob onga huhorjahon, atap Ia do Kristus in. **30** Gabe luar ma sidea hun huta ai laho marayaksi. **31** Sanggah sonai, nini susianni ai ma mangojursi: Mangan ma Guru in! **32** Tapi nini ma bani susianni ai: Adong do sipanganon Bangku, na so binotohnima! **33** Gabe nini susian ai ma samah sidea: Ai adong do nani, na mamboban sipanganon hu-Bani? **34** Ihatahon Jesus ma hubani sidea: Sipanganon do ai Bangku, mangkorjahon rosuh ni na marsuruh Ahu ampa mandobkon lahoanni. **35** Ai lang ihatahon hanima: Ompat bulan nari jumpah ma pariama? Tapi huhatahon ma bannima: Mangkawah ma hanima, tonggor hanima ma juma in, domma gorsing, boi ma sabion. **36** Manjalo upah ma sipanabi anjaha patumpuhon buah hu hagoluhan na sadokah ni dokahni, ase rap marmalas ni uhur sipartidah pakon sipanabi. **37** Ai ijon ma sintong hata, na mangkatahon: Na sada martidah, na legan manabi. **38** Ahu do marsuruh hanima manabi na so hinalojahonnima. Na legan do mangkorjahon, gabe isambat hanima do horja ni sidea. **39** Jadi buei ma halak Samaria na i huta ai na gabe porsaya Bani, halani hasaksian ni naboru ai na mangkatahon: Haganup, na dob huhorjahon ipatugah do bangku. **40** Das-honsi halak Samaria ai bani Jesus, ielek-elek sidea ma Ia tondok bani sidea, jadi ijai ma Ia dua ari. **41** Anjaha lambin bueini do na porsaya bani hata ni Jesus. **42** Nini sidea ma bani puang-puang ai: Seng be halani hatamai mambahen porsaya hanami. Domma itangar hanami sandiri, anjaha ibotoh hanami, Ia do tongon Sipaluah dunia on. **43** Jadi dob salpu na dua ari ai, misir ma Ia hunjai laho hu Galilea. **44** Ai Jesus sandiri



do manaksihon, na so marsangap nabi i tanoh hagodanganni. **45** Jadi dashonsi Ia i Galilea, ijalo halak Galilea do Ia, halani na dob iidah sidea haganup na binahenni i Jerusalem bani ari raya ai, ai sidea pe dihut do bani pesta ai. **46** Anjaha laho do Ia use hu Kana, na i Galilea, iananni ondi mambahen anggur humbani bah. Jadi adong ma ijai pagawai ni raja, boritan do anakni i Kapernaum. **47** Jadi dob ibogei, na dob roh Jesus hun nagori Judea hu nagori Galilea, ijumpahkon ma Ia, ielek-elek ma, ase tuad Ia pamalum anakni, na mangkatarhatos ai. **48** Jadi ihatahon Jesus ma hubani: Anggo seng iidah nasiam tanda ampa halongangan, seng na porsaya nasiam. **49** Jadi iahatahon pagawai ai ma: Sai tuad ma Ham tuan sanggah lape matei anakkai. **50** Ihatahon Jesus ma hubani: Mulak ma ham, manggoluh ma anakmu ai! Porsaya do halak ai bani hata, na hinatahon ni Jesus bani, lanjar laho ma ia. **51** Sanggah tuad ia, ialo-alo jabolonni ma ia, laho patugahkon, na dob manggoluh anakni ai. **52** Ipapangkei ma humbani sidea panorangni, barang sadihari malum iahap. Jadi nini sidea ma: Nantuari, hira-hira pukul sada do surut pane-pane ai humbani. **53** Idingat bapani ai ma, pala ai ma tongon panorangni sanggah ihatahon Jesus bani: Na manggoluh ma anakmu ai. Gabe porsaya ma ia pakon haganup parrumahni. **54** Ase ai ma tanda na paduahon, na binahen ni Jesus use, dob mulak Ia hun Judea hu Galilea.

**5:1** I pudi ni ai adong ma pesta ni halak Jahudi, jadi tangkog ma Jesus hu Jerusalem. **2** I Jerusalem, i lambung ni horbangan biri-biri ai, adong do sada paridian, na margoran Bethesda bani hata Heber, adong do lima sopou-sopou ijai. **3** Martibalan do ijai buei halak na boritan, na mapitung, na oyangon ampa na matei lopah, na paima-imahon bani pargunsang ni bah ai, **4** ai turun do marnombas malekat ni Naibata manggunsang bah ai. Anjaha na parlobei masuk hu bagas, dob hona gunsang bah ai, malum ma atap aha pe naboritni. **5** Adong do ijai sada halak, na dob tolu puluh ualuh tahun dokahni boritan. **6** Dob iidah Jesus ia tibal ijai, anjaha ibotoh, sonai ma dokahni ijai, gabe nini ma dompaksi: Sihol malum ham? **7** Nini na boritan ai ma mambalosisi: Ham tuannami, seng dong dihadihangku, na mangabingkon ahu hu paridian in bani pargunsang ni bah in, ai rohhonsi

ahu, domma adong na legan manlobei ahu turun. **8** Nini Jesus ma hubani: Jongjong ma ham, angkat ma podomanmu in, laho ma ham! **9** Jadi mintor jorgit ma halak ai, iangkat ma podomanni, lanjar laho ma ia. Tapi ari Sabat do na sadari ai. **10** Jadi ihatahon halak Jahudi ma bani halak na pinamalum ai: Ari Sabat do arian on, seng bulih boanonmu podomanmu! **11** Nini ma mambalosi: Halak, na pamalum ahu, Ia do mangkatahon bangku: Angkat ma podomanmu, anjaha laho ma. **12** Isungkun sidea ma ia: Ise mangkatahon bam: Angkat ma anjaha laho ma? **13** Tapi seng itandai na boritan ai Ia, ai domma laho Jesus, halani buei do jolma bani ianan ai. **14** Dob salpu ai, jumpah Jesus ma ia i rumah panumbahan, gabe nini ma hubani: Tonggor ma, domma jorgit ham. Ulang be nunut mardousa, ase ulang sogop bamu siparahan. **15** Jadi laho ma halak ai, ihatahon ma bani halak Jahudi, paboa Jesus do na pamalumkonsi. **16** Jadi iparburu halak Jahudi ma Jesus, halani ibahen sonai bani ari Sabat. **17** Tapi nini Jesus ma mambalosi sidea: Na marhorja do Bapa ronsi nuan, Ahu pe marhorja do. **18** Halani ai lambin ipindahi Jahudi ma dalan laho mamunuhsi, ai seng be pitah ari Sabat isedai, tapi igoran do homa Naibata Bapani, anjaha ipados dirini pakon Naibata. **19** Jadi nini Jesus ma mambalosi sidea: Na sintong tumang do na huhatahon on bani nasiam: Aha pe lang tarhorjahon Anak in humbani dirini sandiri, pitah na niidahnin do ihorjahon Bapa in. Ai aha na hinorjahon ni Bapa in, ai do homa ihorjahon Anak in. **20** Ai holong do uhur ni Bapa in bani Anak in, anjaha haganup do ipatuduhkon Bani na hinorjahonni, anjaha patuduhkononni ope Bani horja sibanggalan hunjon, ase longang uhurnasiam. **21** Ai songon pamuhoi ni Bapa in bani na matei, laho pagoluhkon sidea, sonai do Anak in, ipagoluh do atap ise, na sihol pagoluhonni. **22** Ai seng dong na iuhumi Bapa in, tapi domma iondoskon haganup panguhumon in bani Anak in. **23** Ase haganup pasangap Anak in, songon parpasangap ni sidea bani Bapa in. Na so pasangaphon Anak in, ai ma na so pasangap Bapa in, na marsuruhsi. **24** Na sintong tumang do na huhatahon on bani nasiam: Barang ise, na manangihon hatangku anjaha porsaya bani na marsuruh Ahu, domma das bani hagoluhan na sadokah ni dokahni; seng pala be ia hu paruhuman, domma mandipar ia humbani hamateian hu hagoluhan. **25** Na sintong tumang do na huhatahon bani

nasiam: Na roh ma panorangni, anjaha domma masa ai nuan, bogeion ni na matei in ma sora ni Anak ni Naibata, gabe manggoluh ma na mambogeisi.

**26** Ai songon Bapa in pargoluh ibagas dirini, lanjar sonai do ibere bani Anak in, ase pargoluh Ia ibagas dirini. **27** Anjaha ibere do Bani kuasa manguhumi, halani Anak ni jolma Ia. **28** Ulang ma longang uhurnasiam pasal ai, ai na roh ma panorangni, bogeion ni haganup halak na i tanoman in ma sorani, **29** jadi mandarat ma, sihorjahon na madear puho hu hagoluhan, tapi sihorjahon na jahat puho bani uhum. **30** Seng tarhorjahon Ahu atap aha pe humbani diringku sandiri, domu hubani na hubogei do panguhumhu, anjaha pintor do uhumhu, halani seng hupindahi rosuh ni uhurhu, rosuh ni na marsuruh Ahu do. **31** Anggo Ahu manaksihon pasal diringku, seng na sintong hasaksiankai. **32** Adong do na legan manaksihon Ahu, anjaha hubotoh sintong do hasaksianni ai pasal Ahu. **33** Domma isuruh nasiam na marayak si Johannes, anjaha domma isaksihon hasintongan ai. **34** Ia Ahu, seng huporluhon hasaksian ni jolma, tapi husahapkon pe ai, andohar maluah nasiam. **35** Palita na gara anjaha na marsinalsal do ia, anjaha marosuh do nasiam tongkin marmalas ni uhur ibagas sondangni ai. **36** Adong do hasaksian bangku na surungan humbani si Johannes; ai horja, na niondoskon ni Bapa in Bangku, sidobhononku, in ma horja na hubahen in, in do manaksihon paboa na isuruh Bapa in do Ahu. **37** Anjaha Bapa na marsuruh Ahu pe isaksihon do Ahu. Seng onggga ibogei nasiam sorani, anjaha rupani pe seng onggga iidah nasiam. **38** Hatani pe seng marianan ibagas nasiam, ai seng porsaya nasiam bani na sinuruhni. **39** Ipareksa nasiam do Surat in, ai jumpah nasiam do ijin, nini uhurnasiam, hagoluhan na sadokah ni dokahni. Surat in do tongon na manaksihon pasal Ahu. **40** Tapi seng ra nasiam roh hu-Bangku, ase dapotan hagoluhan nasiam. **41** Seng hujalo hasangapon humbani jolma. **42** Tapi hutanda do nasiam, seng dong holong dampak Naibata bani nasiam. **43** Roh do Ahu ibagas goran ni Bapa, hape seng ijalo nasiam Ahu. Tapi anggo roh na legan ibagas goranni sandiri, ijalo nasiam do anggo ai. **44** Sonaha ma tarbahen nasiam porsaya, ai marsijaloan sangap do nasiam samah nasiam; tapi anggo sangap na humbani Naibata na sasada in, seng ipindahi nasiam. **45** Ulang ma iagan nasiam, Ahu mangaduhon nasiam bani Bapa in. Adong

do na mangaduhon nasiam, ai ma si Musa, hatengeran ni uhurnasiam ai. **46** Ai ambit na porsaya nasiam bani si Musa, porsaya do nasiam age Bangku, ai pasal Ahu do isuratkon. **47** Tapi anggo seng porsaya nasiam bani suratni, sonaha ma porsaya nasiam bani hatangku?

**6:1** Dob salpu ai, idipari Jesus ma tao Galilea, ai ma tao Tiberias. **2** Buei do halak mangirikkonsi, halani iidah sidea tanda halongangan, na binahenni bani halak na boritan. **3** Jadi tangkog ma Jesus hu dolog, laho hundul hujai rap pakon susianni. **4** Tapi dohor ma Paska, ai ma ari raya ni Jahudi. **5** Sanggah mangkawah Jesus anjaha iidah roh buei halak hu lobeini, jadi nini ma dompak si Pilippus: Hunja ma bolionta ruti, ase mangan sidea in? **6** Tapi ihatahon pe sonai, na laho manlajousi do, ai ibotoh do aha sibahenonni. **7** Ibalosi si Pilippus ma Ia: Harga dua ratus dinar pe ruti seng sungkup bani sidea, ase ganup sidea manjalo otik bei. **8** Jadi marbalos ma hubani sahalak humbani susianni ai, ai ma si Andreas, anggi ni si Simon. **9** Adong do ijon sada dakdanak, na mamboan lima ruti pakon dua dengke, tapi sadiha ma in bani na sain buei? **10** Tapi nini Jesus ma: Hatahon hanima ma hundul jolma in! Adong do bolag sampalan ijai, gabe hundul ma dalahi ijai hira-hira lima ribu halak bueini. **11** Ase ibuat Jesus ma ruti ai, anjaha dob ihatahon tarima kasih, ipambere ma bani na hundul ai; anjaha sonai do homa dengke ai, atap sadiha nini uhur ni sidea. **12** Ase dob bosur sidea, nini ma dompak susianni ai: Patumpu hanima ma teba-teba in, ase ulang soya. **13** Jadi ipatumpu sidea ma, anjaha adong do sapuluh dua bantei teba-teba humbani na lima ruti ai, na so bois na mangan ai. **14** Ase dob iidah simbuei ai tanda na binahen ni Jesus ai, nini sidea ma: On ma tongon nabi ia, na sihol roh hu dunia on. **15** dob ibotoh Jesus, na sihol roh sidea manangkapsi, laho pabangkithonsi gabe raja, jadi surut ma sahalaksi hu dolog. **16** Ase dob bod ari, tuad ma susianni ai hu tao ai. **17** Imasuki sidea ma sada parau, anjaha idipari sidea ma tao ai laho hu Kapernaum. Domma pala golap ari, tapi lalab do seng roh Jesus manjumpahkon sidea. **18** Anjaha mangombus ma logou na gogoh, gabe margilumbang ma tao ai. **19** Jadi dob marluga sidea hira-hira dua atap tolu paal daohni, iidah sidea ma Jesus mardalan iatas tao ai, roh mandohori

parau ai, gabe mabiar ma sidea. **20** Tapi nini ma dompak sidea: Ahu do on, ulang mabiar! **21** Sihol pamasukon ni sidea ma Ia hu parau ai; mintor das ma parau ai hu pasir situjuon ni sidea ai. **22** Patarni ai ibotoh na mabuei, na i dipar ni tao ai ma, na so adong ijai parau na legan sobali na sasada ai, anjaha na so dihut Jesus masuk hu parau ai rap pakon susianni, pitah susianni ai do na misir. **23** Tapi marrohan do parau hun Tiberias dohor hu ianan parmanganan ruti, na tinonggohon ni Tuhan in. **24** Ase dob iidah halak na mabuei ai, na so ijai be Jesus, age susianni ai pe, imasuki sidea ma use parau ai, anjaha laho ma sidea hu Kapernaum mangindahi Jesus. **25** Jadi dob jumpah sidea Ia i dipar ni tao ai, nini sidea ma hu-Bani: Guru, sadihari do Ham hujon? **26** Nini Jesus ma mambalosi sidea: Na sintong tumang do na huhatahon on bani nasiam, ipindahi nasiam pe Ahu, sedo halani na dob iidah nasiam tanda in, tapi halani na bosur ai do nasiam mangan ruti ai. **27** Ulang ma sipanganon na laho salpu horjahon nasiam, tapi sipanganon na totap ronsi hagoluhan sisadokah ni dokahni ma, na sihol bereon ni Anak ni jolma in bani nasiam. Ai Ia do na tinokanhon ni Bapa in, Naibata. **28** Dob ai nini sidea ma hu-Bani: Aha ma sibahenonnami, ase ihorjahon hanami horja harosuh ni Naibata? **29** Nini Jesus ma mambalosi sidea: On do horja harosuh ni Naibata, ase porsaya nasiam bani Na sinuruhni. **30** Dob ai nini sidea ma: Aha tanda ibahen Ham, ase iidah hanami gabe porsaya hanami Bamu? Aha ihorjahon Ham? **31** Ia ompungnami, mangan manna do i halimisan, songon na tarsurat in: Ibere do ruti hun nagori atas panganon ni sidea. **32** Jadi nini Jesus ma hubani sidea: Sedo si Musa na mambere ruti bani nasiam hun bagori atas, tapi Bapangku do mambere ruti na tongon bani nasiam hun nagori atas. **33** Ai na susur hun nagori atas, in do sibere hagoluhan hu dunia on, in do ruti na humbani Naibata. **34** Dob ai nini sidea ma: Tuhan, ruti na sonin ma tongtong bere Ham bannami. **35** Nini Jesus ma hubani sidea: Ahu do ruti hagoluhan in. Barang ise na roh hu-Bangku, seng anjai loheian be ia, anjaha na porsaya Bangku, seng anjai horahan be ia. **36** Tapi domma huhatahon bani nasiam: Iidah nasiam do namin Ahu, tapi seng porsaya nasiam. **37** Haganup na binere ni Bapa in Bangku, in do na roh hu-Bangku, anjaha seng anjai pabalionku na roh hu-Bangku. **38** Ai seng susur Ahu hun

nagori atas, laho mambahen rosuh ni uhurhu, rosuh ni uhur ni na marsuruh Ahu do. **39** Anjaha on do rosuh ni uhur ni na marsuruh Ahu, ase ulang magou hubahen age sada humbani haganup, na dob niondoskonni in Bangku, ase hupagoluh in tene bani ari parpudi. **40** Ai on do rosuh ni uhur ni na marsuruh Ahu, ase haganup na mangidah Anak in anjaha porsaya Bani, dapotan hagoluhan na sadokah ni dokahni, anjaha papuhoonku do ia bani ari parpudi. **41** Jadi marungut-ungut ma halak Jahudi dompaksi halani hatani ai: "Ahu do ruti, na susur hun nagori atas," **42** gabe nini sidea ma: Ai lang Ia do Jesus, anak ni si Josep, anjaha ai lang itandai hita do bapani pakon inangni? Mase ma ihatahon: Na susur hun nagori atas do Ahu? **43** Nini Jesus ma mambalosi sidea: Ulang nasiam marungut-ungut! **44** Ise pe lang na boi roh hu-Bangku, anggo seng Bapa in, na marsuruh Ahu, manogusi; anjaha Ahu do na papuhohonsi bani ari parpudi. **45** Adong do tarsurat bani buku ni nabi-nabi: Na niajaran ni Naibata do sidea ganupan. Haganup na manangihon Bapa in anjaha marguru hu-Bani, in do na roh hu-Bangku. **46** Seng dong halak na dob onga mangidah Bapa in, sobali na roh humbani Bapa in; Ia do na dob mangidah Bapa in. **47** Na tongon tumang do na huhatahon on bani nasiam: Barang ise na porsaya, parrupe i do ia bani hagoluhan sisadokah ni dokahni. **48** Ahu do ruti hagoluhan in. **49** Na mangan manna do ompungnasiam i halimisan, anjaha matei do. **50** On do ruti na susur hun nagori atas, ase ulang matei na mangankonsi. **51** Ahu do ruti na manggoluh, na susur hun nagori atas. Barang ise na mangan ruti on, manggoluh do ia sadokah ni dokahni. Ia ruti sibereonkai bahen hagoluhan ni dunia on, in ma dagingku. **52** Dob ai marsual ma halak Jahudi samah sidea, nini ma: Sonaha ma boi Halak on mambere dagingni in panganonta? **53** Jadi ihatahon Jesus ma hubani sidea: Anggo seng ipangan nasiam daging ni Anak ni jolma in, anjaha seng iinum nasiam darohni, seng dapot nasiam hagoluhan in. **54** Na mangankon dagingku anjaha na manginum daroh ku dapotan hagoluhan na sadokah ni dokahni, anjaha papuhoonku do ia bani ari parpudi. **55** Ai sipanganon na tongon do dagingku, anjaha siinumon na tongon do darohku. **56** Barang ise na mangankon dagingku anjaha na manginum darohku, ai do na marianan ibagas Ahu anjaha Ahu ibagas ia. **57** Songon parsuruh ni Bapa Sipargoluh

in Bangku, gabe manggoluh Ahu marhitei Bapa in, sonai do manggoluh marhitei Ahu na mangankon Ahu. **58** On do ruti na susur hun nagori atas, tapi seng songon na pinangan ni ompung-ompung ondi, hape matei do. Na mangankon ruti on manggoluh do ronsi sadokah ni dokahni. **59** In ma hata ni Jesus, sanggah mangajari Ia i parguruan i huta Kapernaum. **60** Ase buei ma humbani susianni na manangar hata ai, mangkatahon: Hata na koras do in, ise ma ra pabogei-bogei in? **61** Ibotoh Jesus ma, na dob marungut-ungut susianni ai pasal ai, gabe nini ma dompak sidea: Mintor halani in ma hanima sangsi? **62** Sonaha ma anggo iidah hanima holi Anak ni jolma in naik hu iananni hinan? **63** Tonduy in do pagoluhkon, seng marguna anggo daging in. Ia hata na huhatahon bannima, Tonduy do in ampa hagoluhan. **64** Tapi adong do deba humbannima na so porsaya. Ia Jesus ibotoh hinan do humbani mungkahni, ise sidea na so porsaya ampa na sihol mantahihonsi. **65** Jadi nini ma: Halani ai ma ase huhatahon bannima, paboa na so tarbahen atap ise roh hu-Bangku, anggo seng na binerehon ai bani marhitei Bapa in. **66** Buei ma humbani susianni ai, na manadingkonsi hunjia nari, seng be ihasomani sidea Ia. **67** Jadi nini Jesus ma hubani na sapuluh dua ai: Ai seng dihut hanima sihol laho? **68** Ibalosi si Petrus ma Ia: Hubani ise ma hanami laho Tuhan? Bamu do hata hagoluhan sisadokah ni dokahni! **69** Anjaha domma ihaporsayai anjaha itanda hanami: Ham do Na pansing ni Naibata! **70** Ibalosi Jesus ma sidea: Ai lang sapuluh dua do hanima, na dob hupilih in? Tapi sibolis do sada humbannima. **71** Si Judas, anak ni si Simon Iskariot do, na hinatahonni ai. Ia do na mantahihonsi use, ai ma sahalak humbani na sapuluh dua in.

**7:1** Dob salpu ai, idalani Jesus ma tanoh Galilea; seng ra Ia mardalani i Judea halani sihol do bunuhon ni halak Ia. **2** Anjaha dohor ma pesta lampo-lampo ni halak Jahudi. **3** Jadi ihatahon saninani ai ma hu-Bani: Misir ma Ho hunjon laho hu Judea, ase dihut susianmai mangidah horja na hinorjahonmin. **4** Ai seng bani na ponop ihorjahon halak sibahenonni, anggo sihol tarbarita Ia. Anggo sapala ihorjahon Ho na sonin, patalar ma dirimu bani dunia on. **5** Ai age saninani ai, seng porsaya Bani. **6** Jadi nini Jesus ma hubani sidea: Seng jumpah ope panorangku, tapi tongtong do

sirsir anggo panorangnasiam. **7** Sonaha ma boi sogam uhur ni dunia on bani nasiam; anggo Ahu ihasogamhon do, halani husaksihon na jahat do horjani. **8** Nasiam ma tangkog marpesta, anggo Ahu, seng tangkog hu pesta ai, halani seng jumpah ope panorangku. **9** Dob ihatahon sonai, soh ma Ia i Galilea. **10** Tapi dob tangkog saninani ai hu pesta ai, Ia pe tangkog ma, seng talar, tapi ponop do. **11** Ase ipindahi halak Jahudi ma Ia bani pesta ai, nini sidea ma: Ai ija do Ia? **12** Jadi buei ma sahap-sahap pasalsi itongah-tongah ni halak na mabuei ai. Adong na mangkatahon: Paruhur na mader do Ia. Na legan mangkatahon: Lang, sipakahou halak na mabuei do Ia. **13** Tapi seng dong na pag marsahap torang-torang pasalsi, halani biar dampak Jahudi ai. **14** Bani partongahan ni pesta ai, tangkog ma Jesus hu rumah panumbahan ai mangajari. **15** Jadi longang ma halak Jahudi, nini ma: Sonaha do pambotoh ni On pasal na tarsurat in, ai seng onggamarguru Ia? **16** Jadi nini Jesus ma mambalosi sidea: Ia podahku seng na hum-Bangku ai, tapi humbani na marsuruh Ahu do. **17** Barang ise na ra mangkorjahon rosuh ni uurni, botohonni do, barang na humbani Naibata podahku, barang na huhatahon in humbani diringku sandiri. **18** Barang ise na mangkatahon humbani dirini sandiri, sangapni do na pinindahanni. Tapi na mangindahi sangap ni na marsuruhsi, in do parsintong, seng dong na geduk ibagas dirini. **19** Ai lang domma ibere si Musa bani nasiam titah in? Hape sahalak pe seng dong humbani nasiam na mangkorjahon titah in. Mase ma iuhurhon nasiam sihol mamunuh Ahu? **20** Jadi nini na mabuei ai ma: Na isorapi setan do Ham. Mintor ise na mangindahi dalam laho mamunuh Ham? **21** Jadi nini Jesus ma mambalosi sidea: Hubahen sada horja, gabe longang nasiam haganup halani ai. **22** Ibere si Musa do bani nasiam aturan parsunaton (seng humbani si Musa namin ai, tapi humbani ompungta do), gabe bani ari Sabat pe isunat nasiam do jolma. **23** Anggo boi do sunaton jolma bani ari Sabat, ase ulang hona langgar titah ni si Musa, mase ma manggila nasiam Bangku, halani hibul sada jolma hupamalum ari Sabat? **24** Ulang ma marguru bani pangidah tumang panguhumionnasiam, tapi pintor ma panguhum nasiam. **25** Dob ai nini deba halak na hun Jerusalem ma: Ai lang Ia do na sihol bunuhon ni sidea in? **26** Tonggor ma, torang ni parsahapni in, anjaha aha pe lang ihatahon



sidea Bani. Ai na dob torang do nani ibotoh pambobainta, Ia do Kristus in? **27** Tapi tene, ibotoh hita do harohan ni Halak on! Anggo roh Kristus in, seng dong na mambotoh atap hunja harohanni. **28** Dob ai ipagogoh Jesus ma sorani mangajari i rumah panumbahan ai, nini ma: Tongon, itanda nasiam do Ahu, anjaha ibotoh nasiam do hunja harohanku. Tapi seng humbani diringku sandiri Ahu roh; adong do Parsintong in, na marsuruh Ahu, na so tinanda nasiam. **29** Hutanda do Ia, ai hum-Bani do Ahu, Ia do na marsuruh Ahu. **30** Jadi ipindahi sidea ma dalan laho manangkapsi, tapi ise pe lang na mardas tangan hu-Bani, halani lape jumpah panorangni. **31** Tapi buei do humbani na mabuei ai, na gabe porsaya Bani, nini sidea: Anggo roh Kristus, tagamon bueinan tanda bahenonni humbani na binahen ni Halak on? **32** Ibogei Parisei ai ma husip-husip ni na mabuei ai pasalsi, jadi isuruh sintua ni malim ampa Parisei ma upas laho manangkapsi. **33** Jadi nini Jesus ma: Tongkin nari mando Ahu rap pakon nasiam, dob ai laho ma Ahu marayak na marsuruh Ahu. **34** Pindahannasiam ma Ahu, tapi seng jumpah nasiam. Seng tarbahen nasiam roh bani ianankai. **35** Jadi nini halak Jahudi ma samah sidea: Huja do nani sihol misir Ia, ase lang jumpah hita be Ia? Sihol misir Ia nani hubani hasoman na manrantou i tanoh Gorik, laho mangajari halak Gorik ai? **36** Aha do arti ni hata, na hinatahonni ai: "Pindahannasiam ma Ahu, tapi seng jumpah. Seng tarbahen nasiam roh bani ianankai?" **37** Dob ai bani ari parpudi ni pesta ai, bani matani ai, jongjong ma Jesus ijai, ipagogoh ma sorani mangkatahon: Barang ise na horahan, hu-Bangku ma ia roh minum. **38** Songon na hinatahon ni surat in: Bah na manggoluh do mabaor humbani na porsaya Bangku! **39** Pasal Tonduy in do na hinatahonni ai, sijaloon ni halak na porsaya Bani, ai seng ope roh Tonduy in, halani seng ipasangap ope Jesus. **40** Deba humbani na mabuei ai, na mambogei hata ai, mangkatahon: On ma tongon Nabi ai. **41** Na legan mangkatahon: On ma Kristus ai! Tapi na legan use mangkatahon: Mintor hun Galilea ma roh ni Kristus in? **42** Ai lang ihatahon Surat in do, ia harohan ni Kristus, ai ma humbani ginompar ni si Daud anjaha hun huta Betlehem, huta ni si Daud? **43** Masa ma parsalisihan itongah-tongah ni bangsa in marhalani Ia. **44** Deba humbani sidea sihol manangkapsi, tapi seng dong na pag mardas tangan Bani. **45** Jadi mulak ma upas ai bani

sintua ni malim ampa Parisei, gabe ihatahon sidea ma bani sidea: Mase lang iboban nasiam Ia? **46** Balos ni upas ai: Seng onggga ope adong halak na marsahap songonsi ai. **47** Jadi nini Parisei ai ma bani sidea: Ai dihut do homa nasiam ipakahou? **48** Ai adong do humbani pambobai atap humbani Parisei, na porsaya Bani? **49** Tapi pitah halak na mabuei in, na so mambotoh titah in do; bursik ma sidea. **50** Dob ai nini si Nikodemus ma, ai ma sada halak humbani sidea, na roh ijia marayak Jesus: **51** Ai iuhumi titahta do halak, anggo lang palobei nabogei hatani, ase na botoh atap aha na hinorjahonni? **52** Jadi nini sidea ma mambalosisi: Ai halak Galilea do homa ho? Papangkei ma, ase ibotoh ho, na so adong bangkit nabi hun Galilea. **53** Jadi misir ma sidea ganup hu rumahni bei.

**8:1** Dob ai laho ma Jesus hu dolog Jetun. **2** Tapi patarni ai laho ma Ia use hu rumah panumbahan; roh ma halak na mabuei ai hu lobeini, jadi hundul ma Ia laho mangajari sidea. **3** Jadi iboan sibotoh surat ampa Parisei ma puang-puang, na tarjumpah marbangkis, hu lobeini, ipajongjong ma ia hu tongah-tongah, **4** anjaha nini sidea ma hu-Bani: Guru, na tardapot do puang-puang on marbangkis. **5** Nini titah ni si Musa, sipargijigon do bani batu halak na sonon; ia Ham, sonaha do nimu? **6** Ihatahon sidea pe sonai, na laho manlajousi do, ase adong dalam mangaduhonsi. Tapi ipaunduk Jesus ma dirini, lanjar manurat-nurat i tanoh marhitei jari-jarini. **7** Tapi halani sai i nunut sidea manungkunsi, Jesus pe dirgak ma, anjaha ihatahon ma bani sidea: Barang ise na so mardousa humbani nasiam, ia ma parlobei manggijigisi bani batu. **8** Dob ai ipaunduk ma use dirini, anjaha manurati bani tanoh. **9** Tapi mambogei ai, misiran ma sidea sada-sada, pangintuai parlobei, gabe tading ma sahalaksi ampa puang-puang ai, na jongjong ijai. **10** Ipadirgak Jesus ma dirini, nini ma dompaksi: Ija do sidea inang? Seng dong na manguhumi ham? **11** Nini ma: Seng dong Tuhan. Jadi ihatahon Jesus ma: Ahu pe, seng uhumonku ham. Laho ma ham, ulang be nunut ham mardousa hunjon hujanan! **12** Dob ai nini Jesus ma use mangkatahon bani sidea: Ahu do panondang ni dunia on. Seng anjai mardalan bani na golap na mangirikkon Ahu, bani do tene Panondang hagoluhan in. **13** Jadi nini halak Parisei ma hu-Bani: Ia Ham, dirimu do isaksihon Ham; seng

sintong hasaksianmu in. **14** Jadi nini Jesus ma mambalosi sidea: Age pe pasal diringku husaksihon, sintong do hasaksiankin, ai hubotoh do, hunja Ahu roh anjaha huja Ahu sihol laho. Tapi anggo nasiam, seng ibotoh nasiam hunja Ahu roh anjaha huja sihol laho Ahu. **15** Mangihutkon pardagingon do nasiam manguhumi. Anggo Ahu, seng dong huuhumi age ise. **16** Anjaha anggo manguhum Ahu, sintong do uhumhu, ai seng pitah Ahu na manguhum ai, tapi na marsuruh Ahu do hasomanku. **17** Anjaha bani titahnasiam pe tarsurat do: Sintong do sinaksihon ni dua halak. **18** Ahu do na manaksihon pasal diringku, anjaha Bapa in pe, na marsuruh Ahu, isaksihon do Ahu. **19** Nini sidea ma hu-Bani: Ai ija do Bapamu? Ibalosi Jesus ma: Ahu atap Bapa pe, seng itandai nasiam. Ambit itandai nasiam Ahu, tandaon-nasiam do age Bapa. **20** Ai ma ihatahon i kamar parartaan, sanggah na mangajari Ia i rumah panumbahan. Ise pe lang na manangkapsi, ai seng jumpah ope panorangni. **21** Jadi nini ma use mambalosi sidea: Na laho ma Ahu, jadi pindahannasiam ma Ahu, anjaha matei ma nasiam ibagas dousanasiam. Anjaha seng boi nasiam roh hu siparayakonkai. **22** Dob ai nini halak Jahudi ma: Na laho mandolos do Ia nani, ase ihatahon: Seng boi nasiam roh hu siparayakonkai? **23** Jadi nini ma hubani sidea: Na hun toruh on do nasiam, na hun babou do anggo Ahu. Na hun dunia on do nasiam, seng hun dunia on anggo Ahu. **24** Halani ai do ase huhatahon bani nasiam: Na matei ma nasiam ibagas dousanasiam. Ai anggo seng porsaya nasiam, Ahu do In, matei ma nasiam ibagas dousanasiam. **25** Nini sidea ma hu-Bani: Ai ise do Ham? Ibalosi Jesus ma sidea: Songon na dob huhatahon ai bani nasiam! **26** Buei do sihatahononku ampa sipinsangonku pasal nasiam. Parsintong do na marsuruh Ahu, anjaha na hubogei hum-Bani, ai do husaksihon bani dunia on. **27** Seng ibotoh sidea, Bapa in do na sinahapkonni bani sidea marhitei ai. **28** Dob ai nini Jesus ma hubani sidea: Dob pe ipagijang nasiam Anak ni jolma in, ase ibotoh nasiam Ahu do in, anjaha na so adong hubahen humbani diringku, tapi songon na pinodahkon ni Bapa hu-Bangku, sonai do huhatahon. **29** Anjaha na marsuruh Ahu, Ia do hasomanku. Seng onga itadingkon sahalak Ahu, ai rosuh ni uhurni do tongtong huhorjahon. **30** Dob ihatahon sonai, buei ma na gabe porsaya Bani. **31** Jadi ihatahon Jesus ma dompak

halak Jahudi na dob porsaya ai Bani: Anggo totap nasiam ibagas hatangku, sintong ma nasiam susianku. **32** Tandaonnasiam ma hasintongan in, anjaha paluahon ni hasintongan in ma nasiam. **33** Ibalosi sidea ma Ia: Gonompar ni si Abraham do hanami, anjaha seng onggaha hanami hona parjabolonan. Mase ma ihatahon Ham. Maningon paluahon do nasiam? **34** Ibalosi Jesus ma sidea: Na sintong tumang do hatangkon bani nasiam: Sagala na mangkorjahon dousa, jabolon ni dousa do ai. **35** Anjaha jabolon, seng totap ai i rumah; anak do na totap tongtong. **36** Anggo ipaluah Anak in nasiam, na maluah botul ma nasiam. **37** Hubotoh, ginompar ni si Abraham do nasiam, tapi ipindahi nasiam do dalam mamunuh Ahu, ai seng siat hatangku bani nasiam. **38** Na huidah bani Bapa, ai do huhatahon; nasiam pe, na binogeinasiam humbani bapanasiam, ai do ihorjahon nasiam. **39** Jadi nini sidea ma mambalosisi: Ia bapanami, ai ma si Abraham. Nini Jesus ma bani sidea: Ambit anak ni si Abraham do nasiam, ihorjahon nasiam do horja ni si Abraham. **40** Tapi ipindahi nasiam do dalam laho mamunuh Ahu, na patugahkon bani nasiam hasintongan, na hubogei humbani Naibata. Seng sonai pambahen ni si Abraham. **41** Horja ni bapanasiam do na hinorjahonnasiam. Nini sidea ma hu-Bani: Sedo anak salong-salongan hanami, sada do bapanami, ai ma Naibata. **42** Nini Jesus ma hubani sidea: Ambit Naibata do bapanasiam, holong do uurnasiam Bangku, ai humbani Naibata do Ahu roh hujon; seng humbani diringku Ahu na roh on, Ia do na marsuruh Ahu. **43** Mase ma lang iarusi nasiam hatangku? Ai ma, halani seng tartangihon nasiam hatangku. **44** Na marbapa hubani sibolis do nasiam, anjaha rosuh ni bapanasiam do sihol bahenonnasiam. Sibunuh jolma do ia humbani mungkahni, anjaha seng jongjong ia ibagas hasintongan, ai seng dong hasintongan ibagas dirini. Anggo ihatahon ladung, domu hubani hadirionni do na hinatahonni ai, ai siparladung do ia anjaha bapa ni ladung. **45** Tapi hasintongan do huhatahon, hape seng porsaya nasiam Bangku. **46** Ise humbani nasiam boi mambuktihon, pardousa Ahu? Anggo huhatahon na sintong, mase ma lang porsaya nasiam Bangku? **47** Barang ise na humbani Naibata, tangihononni ai do hata ni Naibata. Halani na so humbani Naibata do nasiam mambahen lang itangihon nasiam Ahu. **48** Jadi nini halak Jahudi ma mambalosisi: Ai

lang sintong do hatanami, halak Samaria do Ham anjaha na sibolison? **49** Ibalosi Jesus ma: Seng na sibolison Ahu; hupasangap do Bapa in, jadi iapasi nasiam do Ahu. **50** Ia Ahu seng hupindahahi sangaphu; adong do na mangindahahi ai anjaha na manguhumi. **51** Na sintong tumang do hatangkon bani nasiam: Barang ise na mangkorjahon hatangku, seng idahonni hamateian sadokah ni dokahni. **52** Nini halak Jahudi ma hu-Bani: Sonari ibotoh hanami ma, na sibolison do Ham. Na matei do si Abraham ampa nabi-nabi, hape Ham mangkatahon: Barang ise na mangkorjahon hatangkin, seng dageion ni in hamateian sadokah ni dokahni. **53** Ai banggalan do Ham humbani bapanami si Abraham, na dob matei in? Anjaha nabi-nabi pe matei do. Ai ise do Ham, nini uhurmu? **54** Ibalosi Jesus ma: Anggo Ahu pasangap diringku, na so adong ma sangaphu. Adong do Bapangku, na pasangap Ahu, in ma na hinatahon nasiam Bapanasiam. **55** Anjaha seng itanda nasiam Ia, tapi anggo Ahu hutanda do. Ambit huhatahon, seng hutanda Ia, parladung ma Ahu songon nasiam. Tapi hutanda do Ia, anjaha hudalankon do hatani. **56** Marolob-olob do si Abraham, bapanasiam in, halani sihol idahonni aringkin, jadi saud do iidah, gabe malas ma uhurni. **57** Dob ai nini halak Jahudi ma hu-Bani: Lima puluh tahun pe lape das umurmu, mintor onggama ma iidah Ham si Abraham? **58** Nini Jesus ma hubani sidea: Na sintong tumang do na huhatahon on bani nasiam: Lape tubuh si Abraham, domma adong Ahu. **59** Jadi ibuat sidea ma batu, laho manggijigisi, tapi ponop ma Jesus misir hun rumah panumbahan ai.

**9:1** Dob ai sanggah na montas Ia, iidah ma sada halak, na pitung humbani partubuhni. **2** Jadi nini susianni ai ma manungkunsi: Guru, ise do na mardousa, halak on do atap namatorasni, ase pitung ia humbani partubuhni? **3** Ibalosi Jesus ma: Sedo halani dousani atap halani dousa ni namatorasni, tapi ase ipatar bani horja ni Naibata. **4** Maningon horjahononku do horja ni na marsuruh Ahu, sadokah siang ari; ai rohkonsi borngin, seng tarbahen atap ise pe marhorja. **5** Sadokah i dunia on ahu, panondang ni dunia on do Ahu. **6** Dob ihatahon sonai, martijur ma Ia hu tanoh, laho pamalhot tanoh otik marhitei tijurni ai, idaiskon ma na malhot

ai bani matani, **7** lanjar nini ma hubani: Laho ma ham marsuhap hu bongbongan Siloam (artini: na sinuruh). Jadi laho ma ia marsuhap, gabe marpangidah ma ia mulak hunjai. **8** Jadi nini romban rumahni ma, sonai age na onnga mangidahsi hinan mangindo-indo: Ai lang on do, na hundul mangindo-indo ondi? **9** Na deba mangkatahon: Ia do in! Na deba nari mangkatahon: Lang, tapi usih do ia hujai! Ia sandiri mangkatahon: Ahu do in! **10** Nini sidea ma hubani: Sonaha do parmungkab ni matamu in? **11** Nini ma mambalosi: Sada halak, na margoran Jesus pamalhot tanoh. Idaiskon ma ai bani matangku, anjaha ihatahon ma ahu marsuhap hu bongbongan Siloam. Jadi laho ma ahu marsuhap, gabe marpangidah ma. **12** Dob ai nini sidea ma bani: Ija do Ia? Balosni: Seng hubotoh! **13** Jadi iarahkon sidea ma na pitung hinan ai hulobei ni Parisei. **14** Tapi ari Sabat do tudu, sanggah na pinamalhot ni Jesus tanoh ai, anjaha na niungkabni ai matani ai. **15** Lanjar isungkun Parisei ai ma ia, atap sonaha do, ase marpangidah ia. Jadi nini ma hubani sidea: Tanoh na pinamalhot do idaiskon bani matangku, dob ai marsuhap ma ahu, gabe marpangidah ma ahu. **16** Piga-piga halak Parisei ai mangkatahon: Seng na humbani Naibata Halak ai, ai seng ihargahon ari Sabat. Na legan mangkatahon: Mintor tarhorjahon pardousa ma tanda na sonai ai? Jadi marsalisih ma sidea samah sidea. **17** Dob ai ihatahon sidea ma use bani halak na pitung ai: Ia ho, sonaha do pangkatahonmu pasalsi, halani iungkab matamu? Jadi nini ma: Nabi do Ia. **18** Seng iparhatongon Jahudi ai, na pitung hinan do ia, dob ai marpangidah use, pala idilo sidea namatoras ni na gabe marpangidah ai, **19** anjaha isungkun ma sidea: Anak nasiam do on, na hinatahon nasiam ai pitung humbani partubuhni? Na sonaha do, ase marpangidah ia nuan? **20** Jadi nini namatorasni ai ma mambalosi sidea: Tongon do on anaknami, anjaha pitung do ia tubuh. **21** Sonaha, ase marpangidah ia sonari, seng ibotoh hanami, anjaha ise na mangungkab matani in, seng itanda hanami. Ia ma sungkun nasiam, domma sungkup umurni, domma boi ia marsahap pasal dirini. **22** Ase sonai pe hata ni namatorasni ai, halani mabiar do sidea mangidah halak Jahudi ai. Ai domma manriah halak Jahudi, maningon sipabalion do hun kuria, barang ise na marhatongonhon Kristus do Ia. **23** Halani ai do ase ihatahon namatorasni ai: Domma sungkup umurni, ia ma

sungkun nasiam. **24** Dob ai idilo sidea ma paduahalihon na pitung ondi, nini sidea ma hubani: Pasangap ma Naibata! Ibotoh hanami, pardousa do Halak ai! **25** Jadi nini ma mambalosi: barang pardousa ia seng hubotoh. Pitah on do na hubotoh: Mapitung do ahu hinan, tapi marpangidah do nuan. **26** Dob ai nini sidea ma hubani: Ai aha ibahen bam? Sonaha do ibahen mangungkab matamu? **27** Ibalosi ma sidea: Domma hupatugah ai bani nasiam, na so ibogei nasiam do in? Sonaha, sihol bogeionnasiam use? Sihol nasiam gabe susianni? **28** Jadi isuraki sidea ma ia, nini ma: Ho do susianni, anggo hanami susian ni si Musa do. **29** Ibotoh hanami, na iparsahapkon Naibata do si Musa, tapi anggo Halak on, seng nabotoh, atap na hunja Ia. **30** Jadi nini ma mambalosi sidea: Halongangan ma in tongon na so ibotoh nasiam atap na hunja Ia, hape iungkap do matangku! **31** Ibotoh hita do, na so itangihon Naibata pardousa, tapi na marhabiaran bani, anjaha sihorjahon rosuh ni uhurni, ai do itangihon. **32** Humbani sapari, seng onggab nabogei, adong na mangungkab mata ni halak na mapitung tubuh. **33** Ambit seng humbani Naibata Ia, seng tarbahensi age aha. **34** Jadi nini sidea ma hubani: Hibul do ho tubuh ibagas dousa, hape sihol ajaranmu hanami? Jadi ipabali sidea ma ia. **35** Itangar Jesus ma, na dob ipabali sidea ia. Dob jumpahsi ia, nini ma: Porsaya do ho bani Anak ni jolma in? **36** Jadi nini ma mambalosi: Ai ise do ai Tuhan, ase porsaya ahu Bani? **37** Nini Jesus ma hubani: Na niidahmu, anjaha na marsahap pakon ho, in ma Ia. **38** Jadi nini ma: Na porsaya do Ahu, Tuhan! Lanjar isombah ma Ia. **39** Dob ai ihatahon Jesus ma: Mamboan uhum do, ase roh Ahu hu dunia on, ase marpangidah na so marpangidah hinan, anjaha na marpangidah hinan gabe mapitung. **40** Ibogei deba halak Parisei na rap pakonsi ai ma ai, gabe nini ma dompaksi: Ai dihut do hanami pitung? **41** Nini Jesus ma hubani sidea: Ambit pitung nasiam, seng mardousa nasiam. Tapi halani ihatahon nasiam: "Marpangidah do hanami," gabe totap ma dousanasiam.

**10:1** Na sintong tumang do na huhatahon on bani nasiam: Barang ise, na so masuk hun labah, laho hu harang ni biri-biri, tapi manangkih humbani dalan na legan, panangko do ai anjaha panrampok. **2** Tapi na masuk hun

labah, ai do siparmahan bani biri-biri ai. **3** Ungkabon ni sijaga labah ai ma bani, anjaha itangihon biri-biri ai do sorani; idilo do sidea bani goranni bei, anjaha iboan hu darat. **4** Dob ipadarat haganup na adong bani ai, sai ilobei do ia mardalan, anjaha iirikkon biri-biri ai do ia, ai itanda sidea do sorani. **5** Halak na legan nani, seng ra sidea mangihutkon ai, tapi maporus do sidea humbani, ai seng itanda sidea sora ni na legan ai. **6** Limbaga on ma ihatahon Jesus bani sidea, tapi seng iarusi sidea, na hinatahonni ai bani sidea. **7** Jadi nini Jesus ma use bani sidea: Na sintong tumang do na huhatahon on bani nasiam: Ahu do labah laho hubani biri-biri in. **8** Haganup na manlobei Ahu panangko do in anjaha panrampok, tapi seng itangihon biri-biri in sidea. **9** Ahu do labah in; barang ise na masuk hum-Bangku, maluah do, kaluar masuk ma ia, anjaha dapotan sampalan. **10** Roh pe panangko, pitah na laho manangko, na manayati ampa mangagou do hansa. Roh do Ahu, ase dong hagoluhan bani sidea, anjaha marlobih-lobih. **11** Parmahan na madear do Ahu. Ibere parmahan na madear do hosahni mangkopkop biri-birini. **12** Tapi anggo sipangan gaji, na so siparmahan, na so simada biri-biri in, iidah pe roh begu, itadingkon do biri-biri in laho lintun, gabe isoroh begu ai ma biri-biri in anjaha mambur merap ibahen, **13** ai sipangan gaji do ia, na so mansarihon biri-biri in. **14** Ahu do parmahan na madear, hutanda do na Bangku, anjaha itanda sidea do Ahu, **15** songon Bapa mananda Ahu, anjaha Ahu mananda Bapa. Hubere do hosahku mangkopkop biri-biringku, **16** Adong ope biri-biringku na legan, na so humbani harang on. Sidea pe dihut do arahkononku, anjaha tangihonon ni sidea do sorangku, gabe sada hulanan ma ai anjaha sada parmahan. **17** Halani on do, ase ihaholongi Bapa in Ahu, halani huberehon hosahku, ase hujalo ai use. **18** Seng dong na mambuat in hum-Bangku, humbani rosuhku do in hubere. Na markuasa do Ahu mamberehon, anjaha na markuasa do Ahu use manjalo in. In ma titah na hujalo humbani Bapa. **19** Tubuh ma use parsalisihan itongah-tongah ni halak Jahudi halani hata ai. **20** Buei do humbani sidea na mangkatahon: Na sibolison do In anjaha na podouan! Mase ma patangi-tangionnima in? **21** Na legan mangkatahon: Sedo sahap ni na sibolison in! Mintor tarungkab sibolis ma mata ni na mapitung? **22** Dob ai jumpah ma use pesta pabayu rumah panumbahan i



Jerusalem, musim borgoh do ijia. **23** Mardalan-dalan do Jesus i emper ni si Salomo, na i rumah panumbahan ai. **24** Roh ma halak Jahudi manginggotisi, nini sidea ma: Sadiha dokah on sungkun-sungkun uhurnami bahenonmu? Anggo Ham do Kristus in, hatahon Ham ma torang bennami. **25** Balos ni Jesus bani sidea: Domma hupatugah bani nasiam, tapi seng porsaya nasiam. Horja na huhorjahon marhitei goran ni Bapa, ai do manaksihon pasal Ahu. **26** Tapi seng porsaya nasiam, ai seng masuk biri-biringku nasiam. **27** Itangihon biri-biringku do sorangku, anjaha itanda sidea do Ahu, iirikkon sidea do Ahu. **28** Hubere do bani sidea hagoluhan na sadokah ni dokahni; seng magou sidea sadokah ni dokahni, anjaha ise pe lang boi manrampas sidea humbani tanganku. **29** Banggalan humbani haganup do Bapa, na mamberehon sidea ai Bangku, anjaha ise pe lang boi manrampas sidea humbani tangan ni Bapa. **30** Sada do Ahu pakon Bapa in. **31** Dob ai ibuat halak Jahudi ma use batu, laho manggijigsi. **32** Tapi nini Jesus ma hubani sidea: Buei do horja na madear humbani Bapa hupatuduhkon bani nasiam. Halani horja do, ase sihol pargijigon nasiam Ahu? **33** Balos ni halak Jahudi: Sedo halani horja na madear, ase sihol pargijigonami Ham, tapi halani pangapasimu ai do, ai ipados Ham do dirimu pakon Naibata, age pe jolma do Ham. **34** Dob ai ibalosi Jesus ma sidea: Ai lang adong do tarsurat bani titahnasiam: Domma huhatahon, Naibata do nasiam? **35** Anggo igoran Naibata, hadasan ni hata ni Naibata, anjaha seng tarkahua Surat in, **36** mase ma hatahononnasiam hubani na pinapansing ni Naibata, anjaha na sinuruhni hu dunia on: "Siapasi Naibata do Ham", halani huhatahon: Anak ni Naibata do Ahu? **37** Ambit lang huhorjahon horja ni Bapa, age ulang porsaya nasiam Bangku. **38** Tapi anggo huhorjahon do, hape lang porsaya nasiam Bangku, bani horja in ma nasiam porsaya, ase ibotoh anjaha itanda nasiam, ibagas Ahu do Bapa in, anjaha Ahu ibagas Bapa in. **39** Dob ai sihol ma tangkapon ni sidea Ia, tapi maluah do Ia hun tangan ni sidea. **40** Dob ai laho ma Ia use hu dipar ni bah Jordan, ai ma hu pandidian ni si Johannes hinan, lanjar marinan ijai. **41** Anjaha buei do halak na roh marayaksi, nini sidea ma: Seng adong namin ibahen si Johannes tanda halongangan, tapi haganup na hinatahon ni si Johannes pasal Halak on, sintong do. **42** Jadi buei do halak, na gabe

porsaya Bani ijai.

**11:1** Adong ma sada halak na boritan, si Lasarus, na hun Betania, ai ma huta ni si Maria ampa si Marta saninani ai. **2** Ai ma si Maria, na onnga mamminaki Tuhan in, dob ai na mangapusi naheini marhitei jambulanni. Botouni do si Lasarus na boritan ai. **3** Isuruh botouni ai ma na mangkatahon Bani: Ham Tuhan, boritan do na hinaholongan ni uhurmu! **4** Mambogei ai Jesus, nini ma: Sedo hamateian ujung ni naborit ai, tapi bahen hasangapon ni Naibata do ai, ase marsangap Anak ni Naibata marhitei ai. **5** Tapi holong do uhur ni Jesus bani si Marta, bani saninani ai ampa bani si Lasarus. **6** Anjaha dob ibogei na boritan do ia, soh ope Ia dua ari nari bani iananni ai. **7** Dob salpu ai, nini ma hubani susianNi ai: Eta, laho ma hita use hu Judea! **8** Nini susianni ai ma hu-Bani: Guru baru ope sihol pargijigon ni halak Jahudi Ham, ai ulakanmu ope hujai? **9** Balos ni Jesus: Ai lang sapuluh dua jam do sadari? Barang ise na mardalan arian, seng tartolsu ai, ai iidah do panondang ni dunia on. **10** Tapi barnag ise na mardalan borngin, tartolsu do, ai seng dong panondang bani. **11** Dob ihatahon sonai, nini ma hubani sidea: Ia si Lasarus, huan-huanta ai, domma modom; tapi na laho ma Ahu hujai mamuhoisi. **12** Jadi nini susianni ai ma hu-Bani: Ham Tuhan, anggo na modom do ia, na laho malum do. **13** Pasal parmateini do na hinatahon ni Jesus ai; tapi nini uhur ni sidea pasal na sinok modom do. **14** Jadi ihatahon Jesus ma torang bani sidea: Domma matei si Lasarus, **15** anjaha halani hanima malas do uhurhu lang ijai ahu, ase porsaya hanima; tapi laho ma hita marayaksi. **16** Marsahap ma si Tomas, na ginoran si Rindu-rindu, hubani hasomanni susian ai: Eta ma tongon laho, ase rap matei hita pakonsi! **17** Jadi dob das ijai, domma pala ompat ari ia ibagas tanoman jumpahsi. **18** Ia huta Betania, dohor do ai hun Jerusalem, hira-hira tolu batu do daohni. **19** Buei do roh halak Jahudi marayak si Marta pakon si Maria, laho mangapoh sidea halani botou ni sidea ai. **20** Dob ibogei si Marta na dob roh Jesus, laho ma ia mangalolosi; tading i rumah do anggo si Maria. **21** Jadi nini si Marta ma bani Jesus: Ambit ijon Ham Tuhan, seng matei botouhin! **22** Tapi sonari pe, hubotoh do, atap aha pe ipindo Ham humbani Naibata, sai na bereonni do

Bamu. **23** Ihatahon Jesus ma hubani: Na laho puho do botoumai! **24** Nini si Marta ma hu-Bani: Eak, hubotoh do, na puho do ia bani parpuhoon simagira. **25** Ihatahon Jesus ma hubani: Ahu do parpuhoon ampa hagoluhan. Sai manggoluh do na porsaya Bangku, age pe matei ia. **26** Anjaha ganup na manggoluh anjaha na porsaya Bangku, seng anjai matei ia sadokah ni dokahni! Porsaya do ho ijai? **27** Nini ma hu-Bani: Eak Tuhan, porsaya do ah, Ham do Kristus, Anak ni Naibata, na roh hu dunia on. **28** Jadi dob ihatahon sonai, laho ma ia mandilo si Maria, anggini ai, ihusipkon ma: Domma roh Guru in, idilo do ho! **29** Mambogei ai si Maria tarolos ma ia jongjong, laho manjumpahkansi, **30** ai lape das Jesus i huta ai, tapi bani parjumpahanni pakon si Marta ai ope Ia. **31** Ia halak Jahudi na adong i rumah ai rap pakon si Maria, laho mangapohsi, dob iidah sidea tarolos si Maria jongjong laho hu darat, iirikkon sidea ma ia, ai iagan sidea na laho hu tanoman do ia tangis. **32** Dashonsi si Maria hu parsaranan ni Jesus, anjaha ijin iidah Ia, manrogop ma ia hulobeini, anjaha ihatahon ma: Ambit ijon Ham Tuhan, seng matei botouhai! **33** Dob iidah Jesus ia na tangis ai, sonai homa halak Jahudi hasomanni na roh ai tangis-tangis do, jadi manringis ma Ia anjaha bulinsah, **34** lanjar nini ma: Ija do itibalhon nasiam ia? Nini sidea ma hu-Bani: Roh ma Ham, anjaha idah Ham ma, Tuhan! **35** Jesus pe tangis ma. **36** Jadi nini halak Jahudi ma: Tongor ma, holong ni uhurni in bani! **37** Tapi deba humbani sidea mangkatahon: Ia, na mangungkab mata ni na mapitung, seng tarbahensi gakni, ase ulang matei halak on? **38** Jadi manringis ma use Jesus, dashonsi Ia hu tanoman ai. Batu na niliang do ai, lanjar batu do tutupni. **39** Nini Jesus ma: Angkat nasiam ma batu in! Jadi nini si Marta, botou ni na dob matei ai ma: Tuhan, domma marbau, ai domma pala ompat ari ia matei. **40** Nini Jesus ma hubani: Ai lang domma huhatahon bam, idahonmu do hasangapon ni Naibata, anggo porsaya ho? **41** Jadi iangkat sidea ma batu ai. Mangkawah ma Jesus dompak babou anjaha nini ma: Ham Bapa, tarima kasih ma Bamu, halani itangihon Ham Ahu! **42** Hubotoh do, tongtong do Ahu itangihon Ham, tapi halani na mabuei, na jongjong maringgot on do, ase huhatahon in, ase porsaya sidea, na sinuruhmu do Ahu. **43** Jadi dob ihatahon sonai, ipagogoh ma sorani mandilohon: Lasarus, kaluar ma ho! **44** Jadi luar ma

tongon na matei ai; lilit ope hiou bani naheini ampa tanganni sonai hiou panrungkub bani bohini. Ihatahon Jesus ma: Tanggali nasiam ma ia, ase boi ia mardalan. **45** Jadi buei ma humbani halak Jahudi, na roh hubani si Maria ai, na gabe porsaya Bani, dob iidah sidea na binahen ni Jesus. **46** Tapi deba humbani sidea laho do marayak halak Parisei, laho patugahkon na binahen ni Jesus ai bani sidea. **47** Jadi iadongkon sintua ni malim ampa Parisei ma rapot bangga, ihatahon sidea ma: Aha ma bahenonta? ai buei do tanda ibahen Halak in! **48** Anggo ipaturut hita Ia sonin, porsaya ma halak haganupan Bani, gabe roh ma holi halak Rom manrampas tanohta ampa bangsanta. **49** Tapi sada humbani sidea, ai ma si Kayapas, sintua ni malim bani na satahun ai mangkatahon bani sidea: Na hurang uhur do nasiam! **50** Seng ipingkirhon nasiam, paboa dearan do matei sada halak manghophop halak na mabuei in, humbani na magou ganup bangsa in. **51** Sedo humbani dirini ihatahon ai; tapi halani sintua ni malim do ia bani na satahun ai, ase ijahai, na sihol matei ma Jesus mangkopkop bangsa in. **52** Seng pitah mangkopkop bangsa in, tapi sihol patumpuonni do age anak ni Naibata na marserek in ase gabe sada in. **53** Mulai humbani ari ai manriah ma sidea laho mamunuhsi. **54** Jadi lang be talar-talar mardalani Jesus itongah-tongah ni halak Jahudi, tapi laho ma Ia hunjai hu sada nagori, dohorhon halimisan, hu huta na margoran Efraim; ijai ma Ia marianan ampa susianni ai. **55** Tapi dohor ma Pesta Paska ni Jahudi, jadi buei ma halak na tangkog hun nagori ai hu Jerusalem, paima Paska ai, laho manguras dirini. **56** Ipindahi sidea ma Jesus, anjaha marsisungkunan ma sidea, sanggah jongjong-jongjong sidea i rumah panumbahan ai. Sonaha do nini uhurnasiam? Na so roh do Ia nani hu pesta on? **57** Ai domma iparentahkon sintua ni malim ampa Parisei, ase ipatugah anggo adong na mambotoh, atap ija Ia marianan, ase boi tangkapon ni sidea Ia.

**12:1** Onom ari nari paima Paska ai, das ma Jesus hu huta Betania, ianan ni si Lasarus, na pinuhoan ni Jesus humbani na matei. **2** Jadi ipasirsir sidea ma ijai sipanganon Bani, anjaha si Marta do marugas; si Lasarus ma sada hasomanni, na mangan ai ijai. **3** Jadi ibuat si Maria ma sakati minak nardus na maharga anjaha na so maragu; iminaki ma nahei ni Jesus, anjaha

jambulanni do ibahen manlapui. Jadi igoki misbou ni minak ai ma rumah ai. **4** Sada humbani susianni, ai ma si Judas Iskariot, na sihol mantahihonsi ai, mangkatahon: **5** Mase ma lang najual minak in harga tolu ratus dinar, ase naberehkon in bani halak na masombuh? **6** Ihatahon pe sonai, sedo na masombuh sinarihonni ijai; panangko do ia tene, anjaha halani ia sijolom parduitan, somal do ia buat-buat hunjai. **7** Jadi nini Jesus ma: Paturut ma ia, ai ibahen do in sahira hubani ari pananomhu. **8** Ai tongtong do adong na masombuh itongah-tongahnima, tapi anggo Ahu, seng totap i lambungnima. **9** Jadi buei ma humbani halak Jahudi na mambotoh, na dob ijai Ia; jadi marrohan ma sidea, sedo pitah halani Jesus, tapi sihol idahon ni sidea do homa si Lasarus na dob pinapuho ai humbani na matei. **10** Ia sintua ni malim domma manriah hinan sihol mamunuh si Lasarus homa, **11** ai halanisi buei do halak Jahudi na laho hujai, gabe porsaya bani Jesus. **12** Patarni ai, dob ibogei halak na mabuei, na roh bani pesta ai, na roh ma Jesus hu Jerusalem, **13** jadi ibuat sidea ma bulung-bulung ni palem, laho mangalo-alosi lanjar mandilo-dilohon: Hosianna! Pinasu-pasu ma na roh marhitei goran ni Tuhan in, Raja ni Israel! **14** Jadi dapot Jesus ma sada halode ajar-ajar, ai ma iajak domu hubani na tarsurat in: **15** Ulang ho mabiar, ale boru Sion. Tonggor ma, Rajamu do na roh, mangajak halode poso-poso. **16** Seng dong iarusi susianni ai hinan pasal ai; dob pe marsangap Jesus, ase idingat sidea, na marhahonaan hu-Bani do hape na tarsurat ai ampa pambahen ni sidea hu-Bani. **17** Lanjar isaksihon halak na mabuei, na rap pakonsi ai do, paboa na dob idilo do si Lasarus humbani tanoman, laho mamuhoisi humbani na matei. **18** Ase ialo-alo halak na mabuei ai pe Ia, halani na dob ibogei sidea do tanda halongangan na binahenni ai. **19** Jadi nini halak Parisei ma samah sidea: Tonggor ma, na so marguna do hape na binahen nasiam in, ai ganup do dunia on mangirikkonsi. **20** Adong do deba halak Gorik itongah-tongah ni halak na tangkog ai, laho martonggo bani ari Pesta ai. **21** Jadi iparayak sidea ma si Pilippus, na hun Betsaida, na i Galilea, nini sidea ma: Tuannami, sihol do idahonnami Jesus. **22** Laho ma si Pilippus patugahkon ai bani si Andreas; si Andreas pe laho ma rap pakon si Pilippus patugahkon ai bani Jesus. **23** Jadi nini Jesus ma mambalosi sidea: Na dob jumpah ma panorangni, ase

marsangap Anak ni jolma in! **24** Na sintong tumang do na huhatahon on bannima: Seng na ganda omei in, anggo seng madabuh hu tanoh anjaha matei, dob pe matei, ase buei buahni. **25** Agouan hosah do na mangkaholongi hosahni, tapi na mangkasogamhon hosahni i dunia on, ai do na manramotkonsi das hu hagoluhan sisadokah ni dokahni. **26** Barang ise na sihol mambalosi Ahu, iirikkon ma Ahu; anjaha ia ija Ahu, ijai do juak-juakku. Barang ise na mambalosi Ahu, pasangapon ni Bapa in do ia. **27** Na bulinsah do uhuru nuan. Aha ma sihatahononku? Ham Bapa, paluah Ham ma Ahu hambani panorang on. Tapi nene, halani in do ase das Ahu bani panorang on. **28** Ham Bapa, pasangap Ham ma goranmu! Dob ai roh ma sora hun nagori atas: Domma hupasangap, lanjar pasangaponku do use! **29** Ibogei halak na mabuei, na jongjong ijai ma ai, gabe ihatahon sidea ma: Longgur do ai! Na legan mangkatahon: Malekat do, na marsahap pakonsi! **30** Nini Jesus ma mambalosi: Sedo halani Ahu, ase roh sora ai, halani nasiam do. **31** Sonari ma mardalan uhum bani dunia on, sonari ma sipabalion raja ni dunia on. **32** Anggo Ahu, dob ipagijang Ahu hun dunia on, tarikonku do haganup sidea Bangku. **33** Ihatahon do ai, laho patidakkon parmateini holi. **34** Ibalosi halak na mabuei ai ma Ia: Ibogei hanami hambani titah in, na totap do Kristus in ronsi sadokah ni dokahni. Mase ma ihatahon Ham: Maningon pagijangon do Anak ni jolma in? Ise do Anak ni jolma in? **35** Jadi ihatahon Jesus ma bani sidea: Tongkin nari mando Panondang in bani nasiam. Mardalan ma nasiam, sanggah bani nasiam ope Panondang in, ase ulang idorab na golap in nasiam; na mardalan bani na golap, seng ibotoh, atap dompak ja do ia laho. **36** Sanggah bani nasiam ope Panondang in, porsaya ma nasiam bani Panondang in, ase gabe anak ni Panondang in nasiam! Ai ma ihatahon Jesus, dob ai itadingkon ma sidea laho marponop. **37** Age pe sonai buei ni tanda ibahen ilobei ni sidea, seng porsaya sidea Bani, **38** ase jumpah na hinatahon ni nabi Jesayas: Ham Tuhan, ise ma na porsaya bani ambulannami? Anjaha hagogohon ni Tuhan, bani ise ma in talar? **39** Seng tarbahen sidea porsaya, ai sonon ope hata ni si Jesayas: **40** Ipapitung do mata ni sidea, anjaha ipahengkeng uhurni, ase ulang marpangidah mata ni sidea, anjaha ulang marpangarusion uhur ni sidea; ulang mulak sidea, ulang

malum sidea hubahen. **41** Sonai do ihatahon si Jesayas, halani iidah hasangaponni ai, anjaha isahapkon pasalsi. **42** Age humbani sipambobai buei do na porsaya Bani, tapi halani biar ni sidea mangidah Parisei, seng ibagas na talar, ase ulang ipabali sidea humbani kuria, **43** ai holongan do uhur ni sidea bani hasangapon na humbani jolma, ase hasangapon na humbani Naibata. **44** Dob ai dilo-dilo ma Jesus, nini ma: Na porsaya Bangku, sedo Ahu na hinaporsayaanni ai, tapi na marsuruh Ahu do. **45** Na mangidah Ahu, mangidah na marsuruh Ahu do. **46** Ahu do Panondang na roh hu dunia on, ase ulang marianan ibagas na golap sagala na porsaya Bangku. **47** Anggo adong na manangar hatangku, hape seng ihorjahon, seng Ahu na manguhumisi; ai seng roh Ahu, laho manguhum dunia on, tapi laho paluahkon do. **48** Na manulak Ahu, anjaha na so manjalo hatangku, domma adong na manguhumsi; hata na huhatahon ai do manguhumsi bani ari parpudi. **49** Ai seng humbani diringku Ahu marsahap, tapi Bapa, na marsuruh Ahu, Ia do na mangaturhon Bangku pasal sisahapkononku ampa sihatahononku. **50** Anjaha hubotoh, hagoluhan sisadokah ni dokahni do titahni in. Ase na huhatahon in, sonin ihatahon Bapa in Bangku, sonai do huhatahon.

**13:1** Paima pesta Paska ai, dob ibotoh Jesus, na roh ma panorangni manadingkon dunia on, laho marayak Bapa in, ipataridahkon ma holongni ronsi ujungni na dong Bani i dunia on, songon pangkaholongini hinan bani sidea. **2** Sanggah na mangan ai sidea, domma isuanhon sibolis in partahitahian hubagas uhur ni si Judas Iskariot, anak ni si Simon. **3** Halani ibotoh Jesus do, na dob iondoskon Bapa in haganup hubagas tanganni, Ia roh humbani Naibata anjaha mulak ma hubani Naibata, **4** gabe jongjong ma Ia humbani na mangan ai, itanggali ma baju ganjang ni, ibuat ma basahan lanjar igonditkon ma. **5** Dob ai iuseihon ma bah hu sambung, iburihi ma nahei ni susianni ai, anjaha iapusi ma ai merhitei basahan na ginonditkonni ai. **6** Das ma Ia hubani si Simon Petrus, jadi nini si Petrus ma hu-Bani: Mintor Ham ma Tuhan mamurihi naheihu? **7** Nini Jesus ma mambalosisi: Seng iarusi ho nuan na hubahen on, tapi arusanmu do ai use. **8** Nini si Petrus ma hubani: Lalap ma lang bulih Ham mamburihi naheihu. Nini

Jesus ma mambalosisi: Anggo seng huburihi ho, seng parrupei ho Bangku.

**9** Nini si Simon Petrus ma: Tuhan, ulang ma pitah naheihu, dihut ma tangan pakon ulungku! **10** Dob ai nini Jesus ma hubani: Halak na dob pinaridi, seng pala burihan be (sobali naheini), ai domma borsih ia ganupan. Na dob borsih do hanima, tapi seng haganup. **11** Ai ibotoh do, na sihol mantahihonsi, halani ai do, ase ihatahon: Seng haganup hanima borsih! **12** Ase, dob iburihi Jesus nahei ni sidea, ipakei ma use baju ganjangni, hundul ma Ia, lanjar nini ma bani sidea: Ai iarusi hanima do na hubahen in bennima? **13** Igoran hanima do Ahu Guru anjaha Tuhan, anjaha sintong do pangkatahonnima in, ai in do Ahu tongon. **14** Ase anggo Tuhan anjaha Gurunima mamurihi naheinima, patut ma age hanima marsiburihan nahei! **15** Ai sitiruon do hubere bannima, ase ibahen hanima songon na hubahen in bennima. **16** Na sintong tumang do na huhatahon on bannima: Seng banggalan juak-juak marimbang tuanni, anjaha seng banggalan na sinuruh marimbang na marsuruhsi. **17** Anggo ibotoh hanima ma in, martuah ma hanima na mangkorjahonsi. **18** Seng dampak hanima ganupan hatangkin, hutanda do na dob hutodoh. Tapi ase saud na tarsurat in: Na mangan ruti rap pakon Ahu, in do na manadahkon neheini dampak Ahu. **19** Hupatugah hinan in bannima, paima masa, ase porsaya hanima, anggo masa ma in, paboa Ahu do in. **20** Na sintong tumang do na huhatahon on bannima: Na manjalo na husuruh, Ahu do na jinaloni ai, anjaha na manjalo Ahu, manjalo na marsuruh Ahu do. **21** Dob ihatahon Jesus ai, bulinsah ma Ia, nini ma manaksihon: Na tongon tumang do na huhatahon on bennima: Sahalak humbannima sihol mantahihon Ahu. **22** Marsikawahan ma susian ai, jut ma uhur ni sidea, atap ise do na hinatahonni ai. **23** Sada humbani susian ai, na hinaholongan ni Jesus, hundul dohor i lambungni. **24** Jadi ihilap si Petrus ma ia, ihatahon ma bani: Sungkun ma, ise do na hinatahonni in! **25** Ipadohor ma hu lambung ni Jesus, nini ma hu-Bani: Tuhan, ise do in? **26** Ibalosi Jesus ma ia: Hubani ise huberehon na santopik on, dob husornobhon, ai ma ia. Jadi isornobkon ma ruti na santopik ai, iberehon ma ai bani si Judas Iskariot, anak ni si Simon ai. **27** Jadi dob ijalo ai, masuk ma sibolis bani. Ihatahon Jesus ma hubani: Podas ma bahen sibahenonmin! **28** Tapi seng dong humbani sidea na mangan ai, na



mangarusi na hinatahonni ai. **29** Ai halani si Judas do sijolom parduitan ai, gabe iagan na deba ma, na ihatahon Jesus do ia mamboli na porlu bani pesta ai, atap marsibere-bere bani na masombuh. **30** Ase dob ijalo si Judas na santopik ai, mintor laho ma ia hu darat. Tapi domma bagas borngin. **31** Jadi dob laho ia hu darat, ihatahon Jesus ma: Sipasangapon ma nuan Anak ni jolma in, anjaha Naibata marsangap marhiteihonsi. **32** Anggo marsangap Naibata marhiteihonsi, pasangapon ni Naibata ma Ia ibagas Dirini, anjaha barah ma Ia pasangaponni. **33** Hanima anak-anakku, tongkin nari mando Ahu rap pakon hanima. Pindahannima ma Ahu; songon na dob huhatahon bani halak Jahudi, sonai do hatahononku bannima: Seng tarbahen hanima roh hubani siparayakonkai. **34** Titah na baru do hubere bannima, ai ma, ase marsihaholongan hanima samah hanima. Songon holong ni uhurhu bannima, sonai ma marsihaholongan hanima. **35** Hunjon ma botohon ni ganup halak susianku hanima, anggo marsihaholongan hanima. **36** Nini si Simon Petrus ma: Tuhan, huja Ham laho? Balos ni Jesus: Seng tarihutkon ho ope Ahu bani siparayakonkai anggo sonari, use pe ase ihutkononmu Ahu. **37** Nini si Petrus ma hu-Bani: Tuhan, mase lang tarihutkon ahu Ham sonari? Hosahku pe ra do ahu memberehon mangkopkop Ham! **38** Balos ni Jesus: Hosahmu berehononmu mangkopkop Ahu? Na sintong tumang do na huhatahon on bam: Lape martahuak dayok, domma tolu hali Ahu parnalangonmu.

**14:1** Ulang ma tonjan uhornima! Porsaya ma hanima bani Naibata, anjaha porsaya ma homa Bangku! **2** Buei do ianan i rumah ni Bapa. Ambit lang sonai, mintor hatahononku ma bannima, na laho do Ahu pasirsirhon ianan bannima? **3** Anjaha laho pe Ahu pasirsirhon ianan bannima, mulak do Ahu, use mangalop hanima, ase rap hanima pakon Ahu. **4** Anjaha ibotoh hanima do dalam hu ianan siparayakonkai. **5** Nini si Tomas ma hu-Bani: Seng ibotoh hanami, atap huja do Ham laho Tuhan! Sonaha ma pambotohnami bani dalam ai? **6** Nini Jesus ma hubani: Ahu do dalam in pakon hasintongan ampa hagoluhan. Seng dong na das hubani Bapa in, anggo seng marhiteihon Ahu. **7** Anggo itanda hanima Ahu, tandaonnima do age Bapa in. Olat ni on tandaonnima ma Ia anjaha idahonnima. **8** Nini si Pilippus ma

hu-Bani: Tuhan, patuduhkon Ham ma bannami Bapa in, ase sombuh uhurnami! **9** Nini Jesus ma hubani: Domma pala nasain dokah Ahu rap pakon hanima, lanjar seng itandai ho ope Ahu, ale Pilippus? Na mangidah Ahu, na mangidah Bapa in do. Mase ma hatahononmu: Patuduhkon Ham ma bannami Bapa in? **10** Seng porsaya ho, Ahu ibagas Bapa in anjaha Bapa in ibagas Ahu? Hata na huhatahon bannima, seng hambani diringku huhatahon in. Bapa in, na marianan ibagas Ahu, Ia do na mandalankon horjani. **11** Porsaya ma hanima Bangku: Ibagas Bapa in do Ahu, anjaha ibagas Ahu do Bapa in. Anggo lang, halani horja in ma hanima porsaya! **12** Na sintong tumang do na huhatahon on bannima: Horjahonon ni na porsaya Bangku do songon horja na hubahen in; lobih hunjai ope bahenonni, ai na laho ma Ahu hubani Bapa in. **13** Ase barang aha pe sipindoonnima marhitei Goranku, bahenonku do, ase marsangap Bapa in ibagas Anak in. **14** Barang aha ipindo hanima hum-Bangku marhitei Goranku, bahenonku do ai. **15** Anggo na holong do uhurnima Bangku, dalankononnima do titahku. **16** Anjaha pindoonku ma bani Bapa in, ase ibere bannima sada Pangapiti na legan, ase Ia ma mangkasomani hanima lalab, **17** in ma Tonduy hasintongan in, na so tarjalo dunia on, ai seng iidah anjaha seng itanda. Tapi itanda hanima do Ia, ai na rap ma Ia pakon hanima, anjaha ibagas hanima ma Ia. **18** Seng tadingkononku hanima tading maetek; na roh ma Ahu marayak hanima. **19** Tongkin nari mando, seng be idahon ni dunia on Ahu, tapi idahonnima do Ahu, ai manggoluh do Ahu, hanima pe manggoluh do. **20** Bani na sadari ai ma botohonnima. Ahu ibagas Bapa, hanima ibagas Ahu anjaha Ahu ibagas hanima. **21** Barang ise na manjolom titahku anjaha idalankon, ai do na marholong ni uhur Bangku. Ihaholongi Bapa do na marholong ni uhur Bangku, anjaha Ahu pe holong do uhuruhani, anjaha patalaronku do Diringkuhani. **22** Ihatahon si Judas ma Bani (sedo si Iskariot ai): Tuhan, aha do halani, ase pitah bannami patalaronmu dirimu, seng bani dunia on? **23** Nini Jesus ma mambalosisi: Barang ise na marholong ni uhur Bangku, horjahononni in do hatanku, jadi haholongan ni Bapa ma ia, gabe roh ma hanami marayaksi, anjaha marianan bani. **24** Na so marholong ni uhur Bangku, seng dalankononni in hatanku, anjaha hata na binogeinima in, sedo Ahu simada

in, tapi Bapa, na marsuruh Ahu do. **25** In ma huhatahon bennima, sanggah rap ope Ahu pakon hanima. **26** Tapi anggo pangapiti in, sisuruhon ni Bapa in marhitei Goranku, ajarhonon anjaha pagolpaon ni In do bannima sagala na huhatahon in bannima. **27** Damei do hutadingkon bannima, damei na adong Bangku do hubere bannima. Seng songon pambere ni dunia on pamberengku bannima. Ulang ma tonjan anjaha ulang ma mabiar uhurnima. **28** Domma ibogei hanima hatangku bannima: Na laho ma Ahu, anjaha na roh ma Ahu marayak hanima. Ambit na holong uhurnima Bangku, malas do uhurnima halani laho Ahu marayak Bapa in, ai banggalan do Bapa in ase Ahu. **29** Anjaha sonari hupatugah hinan ma in bannima, paima masa, ase porsaya hanima masa honsi. **30** Seng be buei sahapkononku bannima, ai na roh ma raja ni dunia on. Seng dong kuasani Bangku; **31** tapi sihol do botohon ni dunia on, na holong do uhurhu bani Bapa in, anjaha sonaha ihatahon Bapa in, sonai do huhorjahon. Ai pe jongjong ma hanima, laho ma hita hunjon!

**15:1** Ahu do hayu anggur na tongon, anjaha Bapa do sihorjai pohon in. **2** Irotap do sagala rantingku na so marbuah, anjaha ipaborsih do sagala na marbuah, ase ganda buahni. **3** Domma borsih hanima halani hata in, na huhatahon bannima. **4** Totap ma hanima ibagas Ahu, songon Ahu ibagas hanima! Songon ranting in, na so tarbahen marbuah humbani dirini sandiri, anggo seng totap bani hayu anggur in, sonai ma hanima, anggo seng totap hanima ibagas Ahu. **5** Ahu do hayu anggur in, hanima do ranting in. Na marianan ibagas Ahu, anjaha Ahu ibagas dirini, in ma na marbuahkon buei, seng tarhorjahon hanima age aha, anggo seng marhasoman Ahu. **6** Barang ise, na so marianan ibagas Ahu, ambukkonon do ai songon ranting ai gabe masak; ipatumpu ma ai, igijigkon hubagas apuy, jadi mosog ma. **7** Anggo marianan hanima ibagas Ahu, anjaha marianan hatangku ibagas hanima, Ahu bannima, jumpah hanima do barang aha pe ipindo uhurnima. **8** Marhitei ai marsangap ma Bapangku, anggo ramos buahnima, anjaha gabe susianku hanima. **9** Songon pangkaholongi ni Bapa Bangku, sonai do holong ni uhurhu bannima. Totap ma hanima ibagas holong ni uhurhu. **10** Anggo ihorjahon hanima titahku, marianan ma hanima ibagas holong ni

uhurhu, songon Ahu na mangkorjahon titah ni Bapa, gabe marianan ibagas holong ni uhurni, **11** Ase huhatahon pe in bannima, ase marianan malas ni uhurhu ibagas hanima, anjaha gok malas ni uhurnima. **12** On ma titahku, ase marsihaholongan hanima samah hanima, songon Ahu na mangkaholongi hanima. **13** Seng dong holong sibanggalan, anggo iberehon sada halak hosahni mangkopkop hasomanni. **14** Huanku ma hanima, anggo ihorjahon hanima na hutitahkon in bannima. **15** Seng hugoran be hanima jabolon, ai seng ibotoh jabolon na hinorjahon ni tuanni; huan-huan do hanima huhatahon, ai domma hupabotohkon bannima, na hutangar humbani Bapa. **16** Sedo hanima mamilih Ahu, tapi Ahu do mamilih hanima, anjaha hupabangkit do hanima, ase laho hanima marbuah, anjaha ase totap buahnima ai, ase ibere bannima sagala sipindoonnima humbani Bapa in marhitei Goranku. **17** On ma hutitahkon bannima: Marsihaholongan ma hanima samah hanima! **18** Anggo idomdomi dunia on hanima, botoh hanima ma, na dob parlobei do Ahu idomdomi. **19** Ambit na hun dunia on hanima, haholongan ni dunia on do hasomanni, halani seng hun dunia on hanima, tapi Ahu do mamilih hanima hun dunia on, ai do ase idomdomi dunia on hanima. **20** Ingat hanima ma hata na dob huhatahon bannima: Seng banggalan jabolon humbani tuanni. Anggo iparburu sidea Ahu, hanima pe parburuonni do. Anggo idalankon sidea hatangu, dalankononni do age hatanima. **21** Tapi haganupan ai bahenon ni sidea do bannima halani goranku, ai seng itanda sidea na marsuruh Ahu. **22** Ambit seng roh Ahu mansahapkon ai bani sidea, seng mardousa sidea ijai; tapi sonari seng dong be sidalian ni sidea manrungkub dousa ni sidea. **23** Na marsogam ni uhur dampak Ahu, sogam do uhurni homa age dampak Bapa. **24** Ambit lang huhorjahon horja itongah-tongah ni sidea, na so onggga hinorjahon ni jolma, seng mardousa sidea ijai; tapi domma iidah sidea in sonari, anjaha sogam do uhur ni sidea Bangku age bani Bapa. **25** Tapi maningon saud do hata na tarsurat ibagas buku titah ni sidea: Sogam do uhur ni sidea Bangku, seng dong marhala! **26** Ase rohhonsi Sipangapiti in, sisuruhonku bannima humbani Bapa in, in ma Tonduy Hasintongan in, na roh humbani Bapa in, Ia do manaksihon pasal Ahu. **27** Tapi dihut ma hanima manaksihon, ai hasomanku do hanima humbani mungkahni.

**16:1** Haganupan in huhatahon bennima, ase ulang sangsi hanima holi. **2** Pabalion ni sidea do hanima hun rumah parguruan (sinagoge), anjaha na roh ma panorangni gabe songon na manggalang bani Naibata do na mamunuh hanima, nini uhur ni sidea. **3** Sonai do bahenon ni sidea halani lang itandai sidea Bapa in, age Ahu. **4** Tapi hupatugah hinan in bannima, ase idingat hanima bani panorangni masa in, paboa na dob huhatahon do in bannima. Seng humbani mungkahni hupatugah in bannima, halani rap ope Ahu pakon hanima. **5** Tapi na laho ma Ahu nuan marayak na marsuruh Ahu, anjaha seng dong age ise humbennima na manungkun Ahu: Na laho huja do Ham? **6** Lambin pusok tene uhurnima, halani huhatahon in bannima. **7** Tapi na sintong do na huhatahon on bannima: Ulihnima do in anggo laho Ahu. Ai ambit seng laho Ahu, seng anjai roh Sipangapiti in bannima, tapi anggo laho Ahu, suruhonku do Ia bannima. **8** Anggo roh Ia, ajaranni do dunia on pasal dousa, pasal hapintoran ampa pasal uhum. **9** Anggo pasal dousa, ai ma na so porsaya sidea Bangku. **10** Anggo pasal hapintoran, ai ma na laho Ahu marayak Bapa, gabe seng idahonnima be Ahu. **11** Anggo pasal uhum, ai ma na dob hona uhum raja ni dunia on. **12** Buei ope namin sihatahononku bannima, tapi seng tarboan hanima ope ai sonari. **13** Tapi rohhonsi Tonduy Hasintongan in, arahkononni do hanima hubagas sagala hasintongan; ai seng adong humbani Dirini sihatahononni, tapi na binogeini, ai do hatahononni, anjaha patugahonni do bannima na sihol masa ope. **14** Pasangaponni do Ahu, ai buatonni do na dong Bangku, laho mangambilankonsi bannima. **15** Haganup na bani Bapa in, na dong Bangku do in; halani ai do ase huhatahon, buatonni do na dong Bangku, laho mangambilankonsi bannima. **16** Tongkin nari mando, gabe seng idahonnima be Ahu, dob ai tongkin nari use, idahonnima ma Ahu. **17** Gabe nini susian ai ma samah sidea: Aha do arti ni na hinatahonni in banta: Tongkin nari mando seng idahonnima be Ahu, dob ai tongkin nari use, idahonnima ma Ahu, ambah ni ai: Na laho ma Ahu bani Bapa in? **18** Jadi nini sidea ma: Aha do artini hata: tongkin nari mando? Seng ibotoh hita artini ai. **19** Ibotoh Jesus ma, sihol roh sidea manungkunsi, gabe nini ma dompak sidea: Na marsisungkunan do hanima pasal na huhatahon in: Tongkin nari mando seng idahonnima be Ahu, dob ai: Tongkin nari use

idahonnima ma Ahu? **20** Na sintong tumang do na huhatahon on bannima: Na laho tangis ma hanima anjaha mandoruhi, tapi malas ma uhur ni dunia on. Pusok do anggo uhurnima, tapi marubah ma pusok ni uhurnima gabe malas ni uhur. **21** Pusok do uhur ni parinangon manubuhkon dakdanakni, anggo jumpah ma panorangni. Tapi dob tubuh dakdanak ai, seng be idingat na maborit ai, ibahen malas ni uhurni, halani na dob tubuh sada jolma hu dunia on. **22** Bannima pe nuan pusok ni uhur do, tapi idahonku do hanima use, gabe marmalas ni uhur ma hanima, anjaha ise pe lang boi mambuat malas ni uhur ai humbannima. **23** Seng sungkunonnima be Ahu bani na sadari ai. Na tongon tumang do na huhatahon on bannima: Atap aha pe sipindoonnima humbani Bapa in, sai na bereonni do marhitei Goranku. **24** Ronsi sonari seng ope mangindo hanima marhitei Goranku. Pindo hanima ma, ase manjalo hanima, ase gok malas ni uhurnima! **25** Marhitei limbaga do husahapkon in bannima. Na roh ma panorangni, seng marlimbaga be Ahu marsahap pakon hanima, tapi torang-torang ma baritahononku bannima pasal Bapa in. **26** Bani ari ai ma hanima mangindo marhitei Goranku, anjaha seng huhatahon bannima, Ahu manonggohon hanima bani Bapa in, **27** ai Bapa in sandiri mangkaholongi hanima, halani na dob holong uhurnima Bangku, anjaha na dob porsaya hanima, Ahu roh humbani Naibata. **28** Na bingkat humbani Bapa in do Ahu roh hu dunia on; tadingkononku ma use dunia on, laho marayak Bapa in. **29** Nini susianni ai ma: Sonari pe, ase torang hatamu, seng songon limbaga be. **30** Sonari ma ibotoh hanami, paboa ibotoh Ham do haganup, anjaha seng pala porlu Bamu, sungkunon ni atap ise Ham. Halani ai ma, ase porsaya hanami, na bingkat humbani Naibata do Ham. **31** Ibalosi Jesus ma sidea: Porsaya ma hanima sonari? **32** Na roh ma panorangni anjaha domma roh in nuan, mambur merap ma hanima, ganup marsitohu dalanni, anjaha tadingkononnima ma Ahu punjung; tapi seng punjung Ahu tene, ai Bapa in do hasomanku. **33** Huhatahon hinan in bannima, ase mardamei hanima ibagas Ahu. Hamarsikon do rupeinima i dunia on, tapi tenger ma uhurnima, domma hutaluhon dunia on.

**17:1** In ma ihatahon Jesus. Dob ai mangkawah ma Ia dampak babou, nini

ma: Ham Bapa, domma jumpah panorangni, pasangap Ham ma Anakmu, ase ipasangap Anakmu Ham. **2** Ai domma ibere Ham kuasa Bani manrajai sagala jolma, laho mamberehon hagoluhan na sadokah ni dokahni bani haganup jolma, na binerehonmu Bani. **3** Ia hagoluhan sisadokah ni dokahni, in ma, anggo itanda sidea Ham, Naibata sisada-sada in, na sintong in, ampa Jesus Kristus, na sinuruhmu. **4** Domma hupasangap Ham i tanoh on, ai domma hudobkon horja, na binerehonmu Bangku, sihorjahononku. **5** Sonari pe Bapa, pasangap Ham ma Ahu hu lambungmu, songon sangaphu sanggah i lambungmu Ahu, sanggah lape adong dunia on. **6** Domma hupatar Goranmu bani jolma na bineremu in Bangku hun dunia on. Ham hinan do simada sidea, anjaha ibere Ham do sidea Bangku; iramotkon sidea do hatamu. **7** Sonari, domma ibotoh sidea, na hum Bamu do haganup na bineremu in Bangku. **8** Ai domma huondoskon bani sidea hata na bineremu in Bangku; domma ijalo sidea hata in, anjaha torang ibotoh sidea Ahu bingkat hum-Bamu, anjaha domma porsaya sidea, Ham do marsuruh Ahu. **9** Hutonggohon do sidea. Sedo dunia on hutonggohon, sidea on do, na bineremu in Bangku, ai Ham do simada sidea. **10** Anjaha sagala na adong Bangku, na adong Bamu do in, anjaha na adong Bamu, na adong Bangku do in, anjaha domma marsangap Ahu ibagas sidea. **11** Seng be i dunia on Ahu, tapi i dunia on ope sidea, anjaha na roh ma Ahu marayak Ham. Ham Bapa na mapansing, ramotkon Ham ma ibagas Goranmu, sidea na bineremu in Bangku, ase sada sidea songon Hita. **12** Sadokah rap Ahu pakon sidea, Ahu do manramotkon ibagas Goranmu, sidea na bineremu in Bangku, anjaha hujagai, gabe seng dong na magou hambani sidea, sobali jolma magou in, ase saud hata ni Surat in. **13** Tapi na roh ma Ahu nuan marayak Ham, anjaha ganupan in husahapkon sanggah i dunia on ope Ahu, ase gok bani sidea malas ni uhur na Bangku in. **14** Domma huondoskon hatamu bani sidea; sogam do uhur ni dunia on bani sidea, ai seng hambani dunia on sidea, songon Ahu na so hun dunia on. **15** Seng hupindo, ase buatonmu sidea hun dunia on, tapi ase iramotkon Ham do sidea dampak pangagou. **16** Seng hun dunia on sidea, songon Ahu na so hun dunia on. **17** Papansing Ham ma sidea ibagas hasintongan; hatamu do hasintongan. **18** Songon parsuruhmu Bangku hu dunia on, sonai

do husuruh sidea hu dunia on. **19** Hupapansing do diringku mangkopkop sidea, ase gabe pansing sidea ibagas hasintongan. **20** Sedo pitah sidea hutonggohon, tapi dihut do na sihol porsaya Bangku, halani hata ni sidea, **21** ase sada sidea haganup, songon Ham Bapa ibagas Ahu, anjaha Ahu ibagas Ham, sonai ma age sidea ibagas Hita, ase porsaya dunia on, Ham do marsuruh Ahu. **22** Domma huberehon bani sidea hasangapon na bineremu in Bangku, ase sada sidea, songon Hita na sada. **23** Ahu ma ibagas sidea, anjaha Ham ibagas Ahu, ase gok dear ni hasadaon ni sidea, gabe ibotoh dunia on, Ham do na marsuruh Ahu anjaha na holong do uhurmu bani sidea, songon holong ni uhurmu Bangku. **24** Ham Bapa, sihol do uhurhu, ia ijin Ahu, ijin ma pakon na bineremu in Bangku, ase iidah sidea hasangaponku, na bineremu in Bangku, ai domma holong uhurmu Bangku, paima tombei dunia on. **25** Ham bapa na bonar, ia lang pe itanda dunia on Ham, anggo Ahu hutanda do Ham, anjaha ibotoh sidea on, Ham do marsuruh Ahu. **26** Domma hupabotohkon bani sidea Goranmu, anjaha pabotohknonku do ope, ase ibagas sidea holong ni uhurmu na hu-Bangku in, anjaha ase Ahu ibagas sidea.

**18:1** Jadi dob ihatahon Jesus sonai, misir ma Ia rap pakon susianni hu dipar ni bah Kidron. Adong ma ijai sada pohon, hujai ma Ia laho pakon susianni. **2** Tapi ibotoh si Judas, sipartahi-tahi ai do homa ianan ai, ai gati do Jesus hujai rap pakon susianni. **3** Ia si Judas, iarahkon ma tentara ampa juak-juak ni malim ampa Parisei, jadi ijumpahkon ma hujai, marrigapan, marsuluh ampa marsinjata. **4** Halani ibotoh Jesus do haganupan na sihol masa Bani, roh ma Ia manjumpahkon sidea, nini ma hubani sidea: Ise do na pinindahannasiam? **5** Nini sidea mambalosi: Jesus, na hun Nazaret! Nini Jesus ma hubani sidea: Ahu do in! Dihut do si Judas sipartahi-tahi ai jongjong ilambung ni sidea. **6** Sanggah ihatahon hubani sidea: "Ahu do in", surut ma sidea mangkatompas hu tanoh. **7** Dob ai iulaki ma manungkun sidea: Ise do na pinindahannasiam? Jadi nini sidea ma: Jesus na hun Nazaret! **8** Balos ni Jesus: Domma huhatahon bani nasiam: Ahu do in! Anggo Ahu do na pinindahannasiam, palopas nasiam ma laho halak on. **9** Ase saud hata na hinatahon in: Seng dong na magou age sada humbani na



bineremu in Bangku. **10** Ia si Simon Petrus marpodang do, isintak ma ai anjaha itampulhon hubani jabolon ni sintua ni malim ai, gabe rotap ma pinggolni siamun. Si Malkus do goran ni jabolon ai. **11** Ihatahon Jesus ma hubani si Petrus: Sarungkon ma podangmin! Ai lang maningon inumonku do panginuman, na binere ni Bapa in Bangku? **12** Dob ai itangkap tentera ampa kopala ni sidea pakon juak-juak ni Jahudi ai ma Jesus, lanjar isangkut ma. **13** Jadi iboan sidea ma Ia parlobei bani si Hannas, ai ma tulang ni si Kayapas, sintua ni malim bani na satahun ai. **14** Ai ma si Kayapas, na mangkatahon hinan bani Jahudi: Dearan do matei sada halak mangkopkop bangsa in. **15** Ia si Simon Petrus pakon susian na sada nari, iirikkon sidea do Jesus. Na marsitandaan do susian na sada ai ampa sintua ni malim ai, jadi masuk ma ia rap pakon Jesus hu alaman ni rumah ni sintua ni malim ai. **16** Tapi jongjong do si Petrus idarat dohorhon labah. Jadi luar ma susian na sada ai, na marsitandaan pakon sintua ni malim ai, marsahap ma ia pakon naboru sijaga labah ai, gabe iarahkon ma si Petrus hubagas. **17** Jadi nini naboru sijaga labah ai ma bani si Petrus: Ai lang ho do sada susian ni halak on? Balos ni si Petrus: Sedo ahu in! **18** Tapi na jongjong do ijai jabolon pakon juak-juak mandadang bani pandadangan, na pinagara ni sidea halani borgohni. Rap pakon sidea do jongjong si Petrus mandadang ijai. **19** Jadi isungkun sintua ni malim ai ma Jesus pasal susianni ampa pasal podahni. **20** Ibalosi Jesus ma ia: Torang-torang do hatangku bani halak na mabuei. Tongtong do Ahu mangajari i parguruan pakon i rumah panumbahan, ai ma ianan partumpuan ni ganup halak Jahudi, anjaha seng dong marponopan Ahu marsahap. **21** Mase Ahu isungkun Ham? Sungkun Ham ma sidea, na mambogei hatangkai! Ibotoh sidea do na huhatahon ai. **22** Dob ihatahon Jesus sonai, ipastap sada juak-juak na jongjong ijai ma Ia, lanjar nini ma: Mintor sonai ma parbalosmu bani sintua ni malim in? **23** Nini Jesus ma mambalosisi: Anggo na salah parsahapkai, patugah ham ma salahni, tapi anggo na sintong do, mase ma ipastap ham Ahu? **24** Ase isuruh si Hannas ma Ia sangkut hubani sintua ni malim, na margoran si Kayapas. **25** Ia si Simon Petrus ijai ope jongjong mandadang. Jadi nini sidea ma hubnai: Ai lang ho do sada susianni? Jadi iporsou ma nini ma: Seng ahu in! **26** Dob ai roh ma sada

halak hambani juak-juak ni sintua ni malim, ai ma sindohor ni parpinggol na tinampul ni si Petrus ai, mangkatahon hubani: Ai lang huidah do ho rap pakonsi i pohon ai? **27** Jadi iporsou si Petrus ma use, dob ai mintor martahuak ma dayok. **28** Jadi girah sogod, iboan sidea ma Jesus hun lobei ni si Kayapas, hu benteng ai. Tapi seng masuk sidea hu benteng ai, ase ulang tarpantang sidea, laho mangankon Paska ai. **29** Jadi luar ma si Latus manjumpahkon sidea, nini ma: Pasal aha do pangaduannasiam dompak halak on? **30** Nini sidea ma mambalosisi: Ambit seng siparjahat halak on, seng anjai ondoskononami Ia bamu. **31** Nini si Latus ma hubani sidea: Boan nasiam ma Ia, uhumi nasiam ma Ia domu hubani aturannasiam. Nini halak Jahudi ma hubani: Seng bulih bunuhonami atap ise pe. **32** Ase jumpah ma ijai na hinatahon ni Jesus hinan pasal dalam ni parmateini. **33** Jadi masuk ma use si Latus hubagas benteng ai, idilo ma Jesus anjaha nini ma hu-Bani: Atene, Ham do Raja ni Jahudi? **34** Ibalosi Jesus ma: Na humbagas uhumu do na hinatahonmu in, atap hata ni halak do in bamu pasal Ahu? **35** Ibalosi si Latus ma: Ai halak Jahudi do ahuh? Bangsamu ampa sintua ni malim ai do padashon Ham bangku. Ai aha dong ihorjahon Ham? **36** Balos ni Jesus: Ia harajaonku seng na hun dunia on ai. Ambit na hun dunia on harajaonku, seng tarbahen lang manlawan juak-juakku, ase ulang hona ondoskon Ahu hubani halak Jahudi; tapi seng sisonin harajaonkin! **37** Jadi nini si Latus ma hu-Bani: Ase raja do Ham? Balos ni Jesus: Songon na hinatahonmu in ma tongon. Raja do Ahu! Ase tubuh pe Ahu, anjaha ase roh pe Ahu hu dunia on, laho manaksihon hasintongan in do. Barang ise na hambani hasintongan, tangihononni in do sorangku. **38** Nini si Latus ma hu-Bani: Aha do hasintongan? Jadi dob ihatahon sonai, luar ma ia use marayak Jahudi, nini ma hubani sidea: Seng dong jumpah ahuh salahni! **39** Tapi tene, somal do hupaluah sada halak bani nasiam sangah Paska. Marosuh do nasiam, ase hupaluah bani nasiam Raja ni Jahudi in? **40** Gabe isurakkon sidea ma use: Ulang Ia! Si Barabas ma! Tapi panrampok do anggo si Barabas.

**19:1** Dob ai itogu si Latus ma Jesus, anjaha ihatahon ma Ia lonsingan. **2** Idandan tentara ai ma sada sortali hambani ranting-ranting na marduri,

anjaha inahkon ma ai hubani uluni; ibahen ma Ia homa marbaju sigenger. **3** Dob ai roh ma sidea hu lobeini, nini ma: Tabi ma Bamu, ale Raja ni Jahudi! Lanjar ipastapi ma Ia. **4** Luar ma si Latus, ihatahon ma hubani halak Jahudi: Tonggor ma, huboan do Ia hu lobeinasiam, ase ibotoh nasiam, na so adong jumpah ahu salahni. **5** Jadi luar ma Jesus marsotali duri anjaha marbaju sigenger. Ihatahon si Latus ma bani sidea: Tonggor nasiam ma jolma in! **6** Jadi dob iidah sintua ni malim ampa juak-juak ai Ia, idilohon sidea ma: Parsilangkon, parsilangkon ma Ia! Ihatahon si Latus ma bani sidea: Boan nasiam ma Ia anjaha parsilangkon nasiam ma! Seng dong jumpah ahu salahni. **7** Ibalosi halak Jahudi ma Ia: Adong do undang-undang bannami, anjaha mangihutkon undang-undang ai maningon marutang hosah do Ia, ai anak ni Naibata do Ia, nini. **8** Mambogei ai si Latus, lambin mabiar ma ia, **9** gabe masuk ma ia use hu kantorni, ihatahon ma hubani Jesus: Ai na hunja do Ham? Tapi seng ibalosi Jesus Ia. **10** Dob ai ihatahon si Latus ma hu-Bani: Mase lang ra Ham marsahapkon ahu? Ai lang ibotoh Ham, na markuasa do ahu paluahkan Ham, anjaha na markuasa do ahu mamparsilangkon Ham? **11** Balos ni Jesus: Seng markuasa ham Bangku, ambit lang na ibere ai bamu hun datas. Halani ai banggalan do dousa ni na mangondoskon Ahu bamu. **12** Olat ni ai nari ipindah si Latus ma dalan laho paluahkan si. Tapi marsurak-surak ma halak Jahudi, nini sidea ma: Anggo ipaluah ham Ia, seng hasoman ni Kesar in be ham! Ai barang ise na mangangkat dirini gabe raja, na mangimbang Kesar do ai. **13** Ase dob ibogei si Latus hata ai, iboan ma Jesus hudarat lanjar hundul ma ia bani hotak paruhuman, bani ianan na margoran Dasor batu, bani hata Heber: Gabbatha. **14** Ai ma na masa bani ari parugason Paska, marayak tongah ari. Ihatahon si Latus ma hubani halak Jahudi: Tonggor nasiam ma Rajanasiam on! **15** Tapi mardilo-dilo ma sidea: Padaoh, padaoh ma Ia! Parsilangkon ma! Nini si Latus ma hubani sidea: Mintor parsilangkononku ma Rajanasiam? Jadi ibalosi sintua ni malim ma: Seng dong rajanami sobali Kesar! **16** Dob ai iondoskon ma Ia bani sidea, ase iparsilangkon; jadi ijalo sidea ma Jesus. **17** Lanjar Ia do mamorsan hayu parsilang ai, laho hu ianan, na margoran partangkurakan; Golgata do goranni bani hata Heber. **18** Ijai ma iparsilangkon sidea Ia rap pakon dua

halak na legan, sada i siamun, sada i sambilou, anjaha Jesus itongah-tongah ni sidea. **19** Ibahen si Latus ma sada surat, anjaha ilongkothon ma ai bani hayu parsilang ai. Sonon do hatani: Jesus, halak Nazaret, Raja ni Jahudi. **20** Buei do halak Jahudi, na mambasa surat ai, ai dohor do hun huta ai iparsilangkong Jesus, anjaha tarsurat do ai bani hata Heber, hata Rom ampa hata Gorik. **21** Dob ai ihatahon pangintuai ni halak Jahudi ma hubani si Latus: Ulang suratkon ham: Raja ni Jahudi, tapi na hinatahonni ai ma: Ahu do Raja ni Jahudi! **22** Balos ni si Latus: Na dob husurat, na dob husurat ma in! **23** Ase dob iparsilangkong tentara ai Ia, ibuat sidea ma hiouni, ibagi ompat ma ai, ganup sidea sabagian, ambah ni ai baju ganjangni ai. Ia baju ganjang ai seng marpanjaruman, na tinonun do ai torus. **24** Nini sidea ma samah sidea: Ulang ma rigat hita on, manjomput na sinurat ma hita pasal on, atap bani ise on. Jadi jumpah ma na tarsurat in, na mangkatahon: Ibagi sidea do hiouhu, anjaha manjomput na sinurat do sidea pasal bajungku. Ase sonai ma pambahen ni tentara ai. **25** Jongjong do ilambug parsilang ni Jesus ai inangni, sanina ni inangni, si Maria parinangon ni si Kleopas, ampa si Maria Magdalena. **26** Anggo Jesus, dob iidah ijai do inangni ampa susian haholongan ni uhurni ai ilambungni, ihatahon ma bani inangni ai: Andin ma inang, anakmu! **27** Dob ai ihatahon ma bani susianni ai: Andin ma inangmu! Olat ni ai nari ijalo susian ai ma ia hu rumahni. **28** Jadi dob ibotoh Jesus, na dob marujung haganup, ase jumpah na tarsurat ai nini ma: Horahan Ahu! **29** Jadi adong ma ijai gusi na marisi anggur na migar. Isornobkon sidea ma limut hubagas anggur na migar ai, ilongkothon sidea ma ai bani hayu ni hisop, anjaha isurdukkon ma hubani pamanganni. **30** Dob ijalo Jesus na migar ai, nini ma: Domma salosei! dob ai ipaunduk ma uluni anjaha iondoskon ma tonduyni. **31** Halani ari parugasonkon do ai, anjaha ase ulang bani parsilang ai bangkei ai sanggah ari Sabat (ai ari na banggal do ari Sabat ai), jadi laho ma halak Jahudi hubani si Latus mangindohon, ase iparpongol ma nahei ni sidea anjaha ipasusur. **32** Jadi laho ma tentara ai, iparpongol sidea ma nahei ni sidua halak ai, na tarsilang rap pakon Jesus. **33** Tapi dashonsi sidea bani Jesus, iidah ma na dob matei Ia, gabe seng be pala iparpongol sidea naheini. **34** Tapi ipantomhon sahalak humbani tentara ai ma tanjani bani

tontonni, gabe mintor luar ma daroh ampa bah. **35** Anjaha na mangidah ai do na manaksihon ai, anjaha sintong do na sinaksihonni ai. Ibotoh do, na sintong do na hinatahonni ai, andohar porsaya age nasiam. **36** Ase masa pe ai, ase saud do na tarsurat in: Seng bulih ponggolhonon holi-holini! **37** Anjaha surat na legan use mangkatahon: Idahon ni sidea do na pinantom ni sidea in. **38** Dob salpu ai ipindohon si Josep, na hun Arimatea ma hubani si Latus, atap boi do pasusuronni bangkei ni Jesus. Dihut do ia susian n Jesus, tapi ponop do, halani biarni mangidah Jahudi. Jadi ibalosi si Latus ma ai, gabe laho ma ia pasusurhon bangkei ni Jesus. **39** Roh do homa si Nikodemus, ai ma na onggga roh marayak Jesus borngin-borngin, iboan do mir na maragu aloe hira-hira saratus kati. **40** Dob ai ibuat sidea ma bangkei ni Jesus, ibaluti ma ai bani hiou putih rap pakon na morum-morum ai, mangihuthon adat pananomoni ni Jahudi. **41** Dohor bani ianan ni Jesus tarsilang ai, adong do sada pohon, anjaha ibagas pohon ai adong do sada tanoman na baru, seng onggga ope inahkon bangkei hujai. **42** Ase hujai ma itibalhon sidea Jesus, halani ari parugasonkon ai, ai dohor do tanoman ai.

**20:1** Dob ai bani ari parlobei, dob salpu ari Sabat, laho ma si Maria hu tanoman, girah sogod, golap-golap ope, gabe iidah ma, na dob tarangkat batu ai hun tanoman ai. **2** Jadi marlintun ma ia mangayaki si Simon Petrus ampa susian na sada nari, haholongan ni uhur ni Jesus, anjaha nini ma hubani sidea: Adong do na mambuat Tuhan in hun tanoman, anjaha seng ibotoh hanami, huja Ia inahkon! **3** Jadi laho ma si Petrus ampa susian na sada nari, gabe das ma sidea hu tanoman ai. **4** Na rap marlintun do sidea na dua ai, tapi hinsahan do susian na sada nari ai humbani si Petrus, gabe parlobei ma ia das hu tanoman ai. **5** Jadi ipaunduk ma dirini, iidah ma tibal pambaluti ai, tapi seng masuk anggo ia. **6** Roh ma homa si Petrus hun pudini, imasuki ma tanoman ai, jadi iidah ma tibal pamaluti ai. **7** Ia hiou pamalut ni uluni, seng rap ai pakon pamaluti ai, pulig do ai ilompit bani ianan na legan. **8** Dob ai masuk ma homa susian na sada nari ai, na parlobei das hu tanoman ai, iidah ma, gabe porsaya ma ia. **9** Ai seng iarusi sidea ope hata ni Surat in, na mangkatahon: Maningon puho do Ia humbani na matei. **10** Dob ai mulak ma susian na dua ai. **11** Ia si Maria, jongjong do

idarat ni tanoman ai, tangis-tangis, anjaha sanggah na tangis ai ia, ipaunduk ma dirini manonggor hubagas tanoman ai. **12** Gabe iidah ma hundul dua malekat ijai, marhiou silopak, sada hampit uluni, na sada nari hampit hatibalan ni nahei ni Jesus. **13** Jadi ihatahon sidea ma hubani: Mase tangis ham inang? Ihatahon ma bani sidea: Adong do na mambuat Tuhanku, anjaha seng hubotoh huja Ia inahkon. **14** Dob ihatahon sonai, marhusor ma ia dompak pudi, gabe iidah ma Jesus jongjong ijai, tapi seng ibotoh Jesus do ai hape. **15** Nini Jesus ma hubani: Ham inang, mase tangis ham? Ise ipindahi ham? Jadi iagan ma, sijaga pohon do Ia, gabe ihatahon ma Bani: Anggo ham do mambuatsi, tuan, patugah ham ma bangku, atap huja do Ia inahkon ham, ase hualop! **16** Dob ai nini Jesus ma hubani: Maria! Jadi idompakkon si Maria ma Ia, nini ma ibagas hata Heber: Rabbuni! (artini: Guru.) **17** Ihatahon Jesus ma hubani: Ulang jamah Ahu, ai seng naik ope Ahu hubani Bapa in! Tapi laho ma ho hubani saninangku, hatahon ma hubani sidea: Na laho tangkog ma Ahu hubani Bapangku anjaha Bapanima, hubani Naibatangku anjaha Naibatanima. **18** Jadi laho ma si Maria Magdalena, ibaritahon ma hubani susian ai: Domma huidah Tuhan in, anjaha on do hatani bangku! **19** Jadi dob bod ari, bani ari parlobei dob salpu ari Sabat ai, sanggah tutup sagala labah ni rumah, niiankon ni susian ai, halani biar ni uhur ni sidea mangidah halak Jahudi, roh ma Jesus jongjong hutongah-tongah ni sidea, anjaha ihatahon ma bani sidea: Damei ma bannima! **20** Jadi dob ihatahon sonai, ipatuduhkon ma tanganni ampa tontonni bani sidea, gabe malas ma uhur ni susian ai, halani na dob iidah sidea Tuhan in. **21** Dob ai ihatahon Jesus ma use bani sidea: Damei ma bannima! Songon sinuruh ni Bapa in Ahu, sonai do suruhonku hanima! **22** Dob ihatahon sonai, manompul ma Ia dompak sidea, anjaha nini ma hubani sidea: Jalo hanima ma Tonduy Na pansing! **23** Anggo isasap hanima dousa ni atap ise pe, na dob sasap ma ai, anjaha anggo ipatotap hanima dousa ni atap ise pe, na totap ma ai. **24** Tapi anggo si Tomas, sada humbani na sapuluh dua in, na margoran si Rindu-rindu, seng rap pakon sidea ia, sanggah na roh ai Jesus. **25** Jadi ihatahon susian na legan ai ma dompaksi: Domma iidah hanami Tuhan in! Tapi ibalosi ma sidea: Anggo seng huidah bani tanganni ai bokas ni paku ondi, anjaha ijamah jari-jaringku bokas ni

paku ondi, anjaha anggo seng hujamah tontonni ai, seng porsaya ahu. **26** Dob salpu ualuh borngin, tumpu ma use susian ai i rumah ondi, rap pakon si Tomas. Jadi roh ma Jesus, sanggah na tutup ai sagala labah, jongjong hu tongah-tongah ni sidea, nini ma dompak sidea: Damei ma bannima! **27** Ihatahon ma hubani si Tomas: Bahen hujon jari-jarimin, anjaha torih ma tanganku! Surdukkon ma tanganmin, manjamah tontonhu. Ulang sangsi uhurmu, porsaya ma! **28** Jadi nini si Tomas ma mambalosisi: Ham Tuhanku anjaha Naibatanku! **29** Jadi ihatahon Jesus ma hubani: Halani iidah ho Ahu, ai do ase porsaya ho. Martuah ma na porsaya, age pe lang iidah! **30** Buei ope tanda na legan, na binahen ni Jesus ilobei ni susianni, na so sinuratkon ibagas buku on. **31** Ase na suratkon pe on, ase porsaya nasiam, Jesus do Kristus, Anak ni Naibata, anjaha marhitei na mangkaporsayai ai dapotan hagoluhan nasiam ibagas Goranni.

**20:1** Dob ai ipataridahkon Jesus ma use dirini hubani susian ai i topi ni tao Tiberias. Sonon ma pardalanni. **2** Tumpu ma si Simon Petrus pakon si Tomas, na margoran si Rindu-rindu, rap pakon si Natanael, na hun Kana i Galilea, pakon anak ni si Sebedeus ampa dua halak nari humbani susianni ai. **3** Jadi nini si Simon Petrus ma hubani sidea: Laho ma ahu mardengke. Ihatahon sidea ma hubani: Dihut ma hanami! Jadi laho ma sidea, masuk ma hu parau, tapi aha pe lang dapot sidea na saborngin ai. **4** Anjaha dob siang ari, jongjong ma Jesus i pasir ai, tapi seng itanda sidea Ia. **5** Jadi ihatahon Jesus ma hubani sidea: Ambia, adong do dengkenima ijin? Ibalosi sidea ma Ia: Seng dong! **6** dob ai ihatahon ma bani sidea: Dabuh hanima ma jalanima hu siamun ni parau in, ase dapotan hanima! Jadi idabuh sidea ma, gabe seng tartarik sidea be jala ai halani buei ni dengke ai. **7** Jadi ihatahon susian haholongan ni Jesus ai ma hubani si Petrus: Tuhan in do in! Jadi dob itangar si Simon Petrus, Tuhan in do ai hape, ialithon ma hiouni, ai seng marhiou ia hinan, gabe manlumpat ma ia hu tao ai. **8** Tapi marparau do anggo susian na legan ai, lanjar manarad jala na marisi dengke ai, ai seng sadiha daoh sidea hundarat, hira-hira dua ratus asta do. **9** Dashonsi sidea hu darat, iidah sidea ma narnar ijai ampa dengke i atasni, ambah ni ai ruti. **10** Ihatahon Jesus ma hubani sidea: Boan hanima ma

deba dengke in, na dapot hanima in! **11** Jadi naik ma si Petrus hu parau ai, isarad ma jala ai hu darat, gok dengke na bangga-bangga, saratus lima puluh tolu bueini, anjaha age pe sonai bueini, seng marigat anggo jala ai.

**12** Dob ai nini Jesus ma hubani sidea: Roh ma hanima! Tapi seng dong humbani susian ai, na pag manungkunsi: Ise do Ham? Ibotoh sidea, Tuhan in do ai. **13** Ase roh ma Jesus, ibuat ma ruti ai, ipambere ma ai bani sidea, sonai homa dengke ai. **14** Ai ma na patoluhalihon ipataridahkon Jesus dirini hubani susianni, dob puho Ia humbani na matei. **15** Ase dob mangan sidea, ihatahon Jesus ma hubani si Simon Petrus: Ale Simon, anak ni si Jonas, holongan do uhurmu Bangku ase halak on? Nini ma hu-Bani: Eak Tuhan, ibotoh Ham do holong ni uhurhu Bamu! Ihatahon Jesus ma hubani: Parmahani ma anak ni biri-biringku! **16** Ihatahon ma use padua-halihon bani: Ale Simon, Anak ni si Jonas, holong do uhurmu Bangku? Nini ma hu-Bani: Eak Tuhan, ibotoh Ham do holong ni uhurhu Bamu! Jadi ihatahon ma hubani: Parmahani ma biri-biringku! **17** Dob ai ihatahon ma patolu-halihon hubani: Ale Simon, anak ni si Jonas, holong do uhurmu Bangku? Jadi pusok ma uhur ni si Petrus, halani patolu-halihon ma ihatahon hubani: Holong do uhurmu Bangku? Jadi ihatahon ma: Haganup do, ale Tuhan, ibotoh Ham; ibotoh Ham do holong ni uhurhu Bamu! Dob ai ihatahon Jesus ma hubani: Parmahani ma biri-biringku! **18** Na tongon tumang do na huhatahon on bam: Sanggah poso ho, ho do manggonditi dirimu, anjaha laho ho huja rosuh ni uhurmu. Tapi dob matua holi ho, surdukkononmu ma tanganmu, jadi gonditan ni halak na legan ma ho, anjaha boanonni ma ho hubani na so harusuh ni uhurmu. **19** Tapi ihatahon pe ai, laho patugahkon parmateini do use, laho pasangaphon Naibata. Jadi, dob ihatahon sonai, nini ma hubani: Ihutkon ma Ahu! **20** Jadi marhusor ma si Petrus, gabe iidah ma mangihut susian haholongan ni uhur ni Jesus, ai ma na hundul darngos bani Jesus, sanggah na mangan ondi sidea, anjaha na manungkunsi ijia: Ise do in Tuhan, na sihol mantahihon Ham? **21** Ase dob iidah si Petrus ia, nini ma hubani Jesus: Ham Tuhan, sonaha ia ambia on? **22** Nini Jesus ma hubani: Anggo marosuh Ahu, totap ia, ronsi roh Ahu, mase ma pala pasari-sarionmu ai? Tapi anggo ho, ihutkon ma Ahu! **23** Ase sar ma hata ai bani hasoman-hasoman ai, na so matei susian ai. Tapi seng



ihatahon Jesus hubani, na so matei ia, tapi sonon do nini: Anggo marosuh Ahu, totap ia ronsi roh Ahu, mase ma pala pasari-sarionmu ai? **24** Ai ma susian, na manaksihon pasal on anjaha na manuratkon, anjaha ibotoh hanami, na sintong do na sinaksihonni in. **25** Tapi buei ope na legan, na binahen ni Jesus; ambit nasuratkon ai sada-sada, nini uhurhu, ra seng siat i dunia on, buku na sinurat ai.